

















1611.

Jesuite

ANTICOTON.

OV

REFVTATION DE LA

LETTRE DECLARATOIRE

DV PERE COTON.

Liure où est prouué que les Iesui-
tes sont coupables & auteurs
du parricide execrable commis
en la personne du Roy tres-
Chrestien HENRY IIII.
d'heureuse memoire.

*Voyez sur cet ouurage et sur
son auteur une Dissertation
qui se trouve a la fin du 2.^e Vol.
de l'hist de Dom Inigo de
Guipuscoa imprimée a la Haye
1738. in 8.^o*

La 1.^{re} Edit. de cet ouurage est de 1610.

M. DC. XI.

CASE

F

39

.326

1611 PR

THE NEWBERRY
LIBRARY

A LA ROYNE.

MADAME,

D'autant que l'opinion commune, tant de vos sujets que des estrangers, est que les Iesuites sont autheurs de ce damnable parricide, qui en frappant au cœur de nostre bon Roy deffunct (que Dieu absolue) a frappé la France à la gorge, & que là dessus ces Peres se plaignent qu'on leur fait tort, & que leurs ennemis sement ces bruits pour les rendre odieux. J'ay pensé estre necessaire de représenter à vostre Majesté les causes de ce diffame, afin que si elles se trouuent bien fondees, elle iuge si elle peut approcher ces Peres de la personne du Roy avec seureté de sa vie, & sans tenir tousiours ces subiets en alarme, & en defiance continuelle. Car

4
si comme remarque le Pere Coton, au commencement de son Epistre Declaratoire, il estoit deffendu de faire boüillir le Cheureau au lait de sa mere, à plus forte raison sera-il licite de mettre le fils entre les mains teintes du sang de son Pere. Je ne veux point estre creu sans preuves euidentes : & ne suis point porté de passion contre leurs personnes : Car ie n'aurois rien à dire contr'eux, si à l'exemple des autres bons Religieux ils se contentoient d'enseigner le peuple, & vacquer à la conduite de l'Eglise. Aussi ce que ie dis, Madame, n'est pas suggeré par les Heretiques : mais c'est la voix de vos Parlements, de la pluspart de vostre Clergé, mesme de la sacree Faculté de Theologie : c'est la clameur vniuerselle de tout vostre peuple. Tous lesquels eussent volontiers appris l'art d'oubliance du Pere d'Aubigny, & se fussent contentez de gemir sans mot dire, n'estoit que

3
nous voyons le meurtre des Rois deuenir vne costume: & que si vostre Majesté n'y remédie, la trahison sera bien tost contee entre les vertus Chrestiennes, & estimee le plus court chemin au Royaume des Cieux. Que si vostre Majesté veut interrompre ses occupations plus importantes pour courir ce liuret, elle recognoistra qu'en ce point, la voix du peuple est la voix de Dieu, lequel vueille faire florir les Lis sur la teste du Roy vostre fils, & vous combler de toute prosperité.

Letres-humble, & tres-obeissant
sujet de vostre Majesté,
P.D.C.

Aduertissement au

LECTEUR.

LE Lecteur ne s'estonnera point si l'Authheur ne se nomme pas: Cela doit estre imputé au temps, auquel il est mal-aysé de dire la Verité, sans se faire des ennemis. Toutesfois s'il se trouue personne qui puisse respondre de point en point à ce Liure. (ce que i'estime impossible, tant la Verité y est euidente) l'Authheur promet d'escrire derechef sur le mesme sujet, & dire son nom. Car il a, & assez de courage, & assez de credit pour se maintenir contre la malueillance des ennemis & perturbateurs du repos public.

*Que la doctrine des Iesuites approuue
le parricide des Rois, & la rebel-
lion des subiets.*

CHAPITRE PREMIER.

POVR oster toute difficulté, & esclarcir ce different. Il est necessaire de reprendre la chose dès sa source. Les histoires de France tesmoignent qu'en l'an 1407. Louys Duc d'Orleāns frere du Roy Charles VI. le 22. de Nouembre fut tué sur le soir par des gens attiltrez par Jean Duc de Bourgongne, lequel disputoit la regence avec le susdit Duc d'Orleans. Ledit Duc de Bourgongne ne pouuant desguiser le faict, osa bien en plein conseil, en presence de tous les Princes du Sang & des officiers de la Couronne. Soustenir qu'il auoit faict iustement : & fut sa cause defenduë par Jean Petit Docteur en Theologie, Normand de nation, lequel par les loix diuines & humaines, & par le droit tant Canon que Ciuil, soustint qu'il estoit loisible à tout homme de tuer vn Tyrā par quelque voye que ce fust. Et la cause demenee en sorte, demy par force, demy par persuation que nulle iustice n'en fut faicte.

Alors viuoit Jean Gerson Chancelier de l'Vniuersité de Paris, homme scauant selon le temps, lequel s'opposoit à ladite proposition de Jean Petit.

L'oraison de
Gerson au
Concile de
Constance,
se void au
premier To-
me des œu-
res de Ger-
son.

Peu apres, à sçauoir en l'an 1416. vn Con-
cile general s'estant assemblé à Constance,
le susdit Gerson y alla en qualité d'Ambas-
sadeur pour le Roy Charles VI. ayant entre
ses memoires & instructions charge expresse
de faire iuger ceste proposition par le Con-
cile: Là les deux parties ouyes, le Concile en
la session xv. condamna la proposition de
Iean Petit, qui commence par *Quilibet Ty-*
ranus &c. definissant que ce n'est point à vn
suiect d'entreprendre sur la vie d'un Prince
sous ombre qu'il est Tyran.

Cet erreur ayant esté enseueli par l'autho-
rité du Concile a esté remis sus par les Peres
Iesuites: mais sous vn autre couleur, à sçauoir
sous ombre de religion, & quand il est iugé
estre necessaire de tuer vn Roy pour la defen-
se de l'Eglise. Pour cet effect ils ont publié pla-
sieurs escrits, esquels ils permettēt à vn sujet
de tuer son Roy, quand il abuse de sa puis-
sance.

Ce liure a
esté de nou-
ueau traduit
en François
par Antoine
de Balinghē
Iesuite, &
Imprimé à
Douay chez
Iean Bogart
1610.

Pierre Ribadenera Iesuite Espagnol a com-
posé vn liure de la religion & des vertus
d'un Prince, où il approuue ceste doctrine:
Au premier liure chap. 15. Il parle ainsi du
parricide de Iacques Clement: *D'autant que*
la resolution que Henry III. prit, fut vn con-
seil de politique & Machiaueliste, & non con-
forme à la loy de nostre Seigneur: Voila pourquoy
par vn iuste iugement de Dieu, le mesme Roy Henry
fut mis a mort par la main d'un pauvre simple &
ieune religieux, & mourut d'un coup de couteau
qu'il luy tira, &c.

Le mesme

Le mesme pour appuyer son dire, il produit vn fragmen d'un liure François, qui appelle la Royne d'Ecosse Martyre, puis adioust. Et neantmoins si deuous nous considerer en sa vie vne chose remarquable à ce propos, & qui a grande apparence d'estre cause d'une si miserable fin. C'est qu'estant en son Royaume d'Ecosse elle a tolleré l'heresie contre le conseil des gens de bien, & notamment de son Docteur & predicateur, lequel deslors pour ceste occasion la quitta & abandonna, & s'en reuine en France & n'a voulu permettre qu'on mit à mort le bastard Stuard, homme factieux & chef des heretiques, en la mort duquel sembloit estre la ruine des heretiques du pays. Ce Iesuïte approuue les assassinats des Princes sans forme de Iustice.

Carolus Scubanus Iesuïte Flamend qui par vn renuersement de lettre s'appelle *Clarus Bonarscius* à faict vn liure intitulé *Amphitheatrum honoris* auquel s'il soustient ceste doctrine meurtriere au cha. 12. du 1. liure, où il dit: s'il aduient que les Denis ou vn Machanidas, ou vn Aristotinus, monstres des sieclés oppriment la France, le Pape ne pourra-il asseurément encourager contre luy quelque Dion, ou quelque Timoleon, ou Philopœmen? c'est à dire des dechasseurs & tueurs de Tyrans? & peu apres, parlant d'un Tyran degastant la France: Nul ne prendra-il les armes contre ceste beste? nul Pontife ne pourra-il tirer ce nostre Royaume de dessous la coignée. Or notez que là il ne parle point d'un vsurpateur, mais d'un Roy qui abuse de sa puissance.

Bellarmin en son second liure contre le Roy d'Angleterre condamne la trahison &

Dionysij
Machani-
das, Aristotinus secu-
lorum poi-
tenta, Gal-
liam oppri-
mant, ne-
mo Pontifex Dionē,
Timoleonem Phi-
lopoemenem Hele-
matum le-
curus ani-
mabit?

Nullus in
hac belluā
miles erit?
nullus Pō-
tifex nobi-
lissimū re-
gnū securi
eximar.

Cur denique Henricus Garnet, vir doctus, et omnis generis & vite sanctitate incomparabilis, ultimo supplicio affectus est, nisi quia reuelare noluit quod salua conscientia reuelare non potuit?
 L. 13. ff. de off. praef. l. de Receptar.
 L. quisquis §. Idouod. Cod. Ad leg. Iul. Maiest.

papa potest mutare regna & vni offerre atque alteri conferre, tamquam summus Princeps spiritualis.
 * Vesperti-

conspiration contre son Prince: mais en paroles ambigues & captieuses: Car en effect il les approuue & y exhorte vn chacun: car il louë le Iesuïte Garnet, de ce qu'ayant sceu par les confessions la conspiration contre le Roy d'Angleterre, il ne la point voulu reueler, i'allegueray ses propres mots. *Pourquoy Henry Garnet homme incomparable en toute sorte de doctrine, & en sainteté de vie, a-il esté puny du dernier supplice. Sinon pource qu'il n'a pas voulu reueler ce qu'il n'a peu reueler en bonne conscience?* Voicy donc la doctrine des Iesuïtes à sçauoir, que si quelqu'un a reuelé à vn Iesuïte son intention de tuer le Roy, il doit tenir cela caché & laisser plustost tuer le Roy & renuerfer tout le Royaume, que de reueler le secret de la confession. Opinion que la Sorbonne ne tient pas: Cela estant du droit diuin d'estre fidele à son Prince, & du droit des gens de tenir les receleurs, autant coupables que les larrons, & en cas de crime de leze Majesté punir esgalement les entrepreneurs, & ceux qui l'ayans sceu ne l'ont pas voulu reueler.

Le mesme Iesuïte Bellarmin, & tous les Iesuïtes avec luy tiennent, que le Pape peut oster les Royaumes, & les donner à qui il luy plaist, & inciter les sujets à se reuolter contre leur Prince, les deliant du serment de fidelité. Les mots de Bellarmin sont tels au 6. cha. du 5. liure du Pontife. *Le Pape peut changer les Royaumes, les arracher à l'un & donner à l'autre, comme souuerain, Prince spirituel.* Et le Iesuïte Gretzer, au liure intitulé *La * Chauue-*

fouris hereticopolitique pag. 159. Nous ne sommes point si craintifs & si tremblans, que nous craignons d'affirmer conuertement que le Pontife Romain peut, si la necessité le requiert, delier les subiers Catholiques du serment de fidelité, si le Prince les traite tyranniquement, mesmes il adioust que si le Pape fait cela prudemment & avec circonspection, c'est vn œuvre meritoire. Considerez la nouuelle espee de merite d'esmouuoir la sedition & commander la desloyauté, de laquelle s'ensuit necessairement l'attentat à la vie du Prince, car en ceste rebellion il est à presumer que le Prince, se defendra par armes, & opposera violence à violence, ce qui ne se peut faire sans le peril de sa vie.

Tolet. 1. au liure de l'instruction des Prestres ch. 13. les subiects ne sont point tenus de garder serment de fidelité à vn excommunié. Là mesme, vn excommunié ne peut excercer aucun acte de iurisdiction. Par ceste regle le Roy Henry III. n'estoit plus Roy, & celuy qui l'a tué, n'a pas tué vn Roy. Mariana Iesuite Espagnol a composé vn liure de *Rege & Regis institutione* imprimé premierement à Tolede chez Piere Roderigo l'an 1599. & pour la seconde fois à Mayence chez Balthasar Lippius l'an 1605. Au 6. chap. de ce liure apres auoir loué Iacques Clement, Il dict *Qu'il auoit apris des Theologiens, lesquels il auoit consulté qu'on peut iustement tuer vn Tyran.* Et là dessus descrivant comme ce ieune moine auoit donné le coup de couteau, Il s'escrie *Insigne animi confidentiam! facinus memorabile! O excel-*

co politic.

Tā timidi
& trepidi
non sumus
vt asserere
palā vereamur
Romanū Pontificē
posse si necessitas
exigat subditos
Catholicos solueri
iuramento fidelitatis,
si Princeps tyrānicē illos tractet
&c.

Excomunicato subditi
nō tenentur iuramento fidelitatis.
Excomunicatus non potest iurisdictionis actū exercere
Cognito à Theologis quos erat sciscitatus
Tyrannū iure interimi posse.
Suo sanguine patriæ communis & gentis libertatē redere.

prem inter lente assurance, ô fait memorable. Et peu apres
 actus & vul- Parmi les coups & les playes qu'il receuoit, il estoit
 nera impē- neanmoins plein de ioye, d'auoir racheté avec son
 felætabatur sang la liberté de sa patrie & de sa nation. Ayant tué
 scilicet cæ- le Roy ils'est acquis vne fort grande reputation & v n
 forege in- meurtre a esté expié par vn autre, & par le sang Ro-
 gens sibi yal a esté faite l'expiation de la mort du Duc de Guise
 nomen, fe- perfidement tué. Ainsi mourut ce Clemēt aagé de 24.
 cit cæde ans, ieune homme de naturel debonaire n'estant point
 cædes ex- robuste de corps, mais vne force superieure luy forrisoit
 piata ac ma les forces & le courage. Ainsi parle ce Iesuite. Et
 nibus Gui- au mesme chapitre parlant du Roy legitime,
 sii ducis per & qui n'est point vsurpateur, & auquel on a
 fide perem- iuré fidelité, il dit, s'il peruertit la religion du païs
 pti regno ou s'il attire dans le pays les ennemis publics celuy qui
 sâguine est pour favoriser aux vœux publics taschera de le tuer,
 par etatum. Je n'estimeray point qu'il face iniustement. Je passe
 Si sacra pa- plus auant au chap. suyuant, auquel il trou-
 triæ pessū- ue bon qu'on empoisonne vn Tyran, toute-
 det publi- fois remarquez la naïfueté, & combien ces
 cosque ho- gens gardent soigneusement les cas de con-
 stes in pa- science: car de peur qu'en empoisonnant la
 triam attra- viande ou le bruuage du Tyran on ne le face
 hat qui vo- estre meurtrier de soy-mesme, Mariana y ap-
 tis publicis porte ce remede. Je voudrois (dit-il) en ceste dou-
 fauentes eū te vser de ce temperament de ne contraindre point ce-
 perime tē- luy qu'on fait mourir d'aualler luy mesme le poison,
 tarithaud lequel receu dans les moëlls le face perir: mais que
 quaquā cū quelque autre mette le poison sans que celuy qu'on
 inique fe- veut faire mourir y ayde aucunement: Ce qui se faict
 cisse existi- quand le poison est si violent que la chaire ou l'habit
 mabo. en estant atteint le puisse faire mourir: Qui est l'artifi-
 Hoc tamē ce dont ie trouue que les Rois Mores ont souuent vsé.
 tempera-
 mento vti
 in hæc qui-
 dem dispu-
 tatione li-
 cebit, si in
 ipse qui pe-
 rimitur ve-

Telle est la pieté de ce Iesuite, en laquelle il nous fait disciples des Mores.

Celiure de Mariana est loué par Gretzerus Iesuite, en son liure intitulé *la chaulnesou- ris*, sus-allegué, page 160. où il dict qu'on calomnie Mariana d'auoir dit qu'il faut tuer tout Prince qui desobeit au Pape. Veu qu'il dit seulement qu'un Prince legitime qui desobeit au Pape ne peut estre tué par un particulier, si ce n'est que iugement en ait esté prononcé, ou que ce soit la voix du peuple, & qu'on ayt le consentement de quelques gens doctes: Or notez que par la sentence iudiciale il entend la deposition faicte par le Pape, par l'approbation des doctes, & par le conseil des Iesuites: & quant au poison mis en l'habit ou sur la chaire, le Iesuite Gretzer en la page 162. approuue simplement le dire de Mariana, & se plaint de ce qu'on accuse Mariana d'auoir dit qu'il faut empoisonner un Tyran, veu qu'il dit au contraire, *Qu'un Tyran ne peut estre legitimement tué par poison, si le tyran mesme le prend & se l'applique à soy mesme, comme il aduient quand on empoisonne sa viande ou son breuuage.* Ainsi en excusant Mariana il dit cependant la mesme chose.

Clarus Bonarscius au liu. de l'Amphiteatre chap. 13. loué * ce Mariana, & pour le stile & pour la matiere. Et veut que tous aages le reuerēt. *Quoy?* (dit-il) *quelle aage ne reuerera la graue & docte construction de Mariana, ses paroles sonantes, la splendeur & sublimité de son aration, son esprit abundant, avec une matiere également louable?*

nenū hau-
rire cogitur
quod inti-
mis medul-
lis cōcepto
pereat Sed
exterius ab
alio adhi-
beaturnihil
adiuuāte eo
qui peri-
mēdus est
nimirū cū
tanta vis est
veneni ut
sella eo aut
veste deli-
buta vim
interficien-
di habeat.
Ne Tyrann-
num quidē
primi vel
secūdi ge-
neris etiam
post Indi-
ciariā cōtra
illum latam
sententiam
veneno li-
citē tolli, si
Tyrannus
ipsemet ve-
nenū illud
sumere &
sibi appli-
care debat.
* Quid? Ma-
riam graue
& decoram
cōstructio-

nem sonā.
tis verba,
splendorē
narrādi que
sublimita-
tē copio-
sum inge-
nium in nō
impari ma-
teria quæ
ætas non
reuerēbi-
tur?
Cuipe ap-
probato
prius à viris
doctis &
grauibus
ex eodem
nostro or-
dine.

Et afin qu'on sçache que ce n'est point l'o-
pinion de peu de Iesuites, au frōt du liure de
Mariana il y a vne approbation & permissiō
d'imprimer du general de l'ordre Aquaiua,
& de Stephanus Hoyeda, visitateur de la so-
cieté de Iesus en la prouince de Toledē. Qui
plus est en la mēme permissiō d'imprimer, il
y a *qu'auant ladite permission coneedee, ces liures de*
Mariana ont esté approuuez par des hommes doctes
& graues, de l'ordre des Iesuites, dōt s'ensuit que
quād mēme le general Aquaiua auroit esté
surpris, (cōme le P. Coton nous veut faire
accroire, forgeant des lettres de cet Aquai-
ua à sa poste) si est-ce que le visitateur & les
Docteurs Iesuites qui ont examiné le liure
auant l'impression, ne peuuent auoir esté
surpris.

Que veut-on dauantage? quelques quatre
mois auant le parricide execrable commis
en la personne de nostre bon Roy, le mēme
acte consistorial par lequel l'arrest contre
Iéan Chastel, & l'histoire de Monsieur le
President de Thou ont esté censurees à Ro-
me, a aussi suspendu & comme mis en surse-
ance vn autre liure de Mariana qui traite des
monnoyes: sans toucher à ce liure qui ap-
prouue le meurtre des Roys. En quoy i'esti-
me que sa Saincteté occupée à d'autres affai-
res a esté surprise par l'artifice des Iesuites qui
regnent à Rome: car sans cela elle eust plu-
stost censuré le liure de Mariana qui enseigne
le meurtre & parricide.

Ce liure de Mariana ayant esté premiere-

ment imprimé à Toledé fut apporté en Frāce
il y a huit ans & présenté au Roy, & les clau-
ses seditieuses de ce liure representees à sa
Majesté, laquelle ayant appelé le Pere Coto
luy demanda, s'il approuoit ceste doctrine.
Mais ledit Iesuite qui plie aux occasions &
sçait s'accōmoder au temps, dit qu'il ne l'ap-
prouoit pas. Suiuant laquelle responce sa
Majesté par le conseil de Mōsieur Seruin son
Aduocat General commanda à Coton d'es-
crire à l'encōtre, mais il s'en excusa, sçachāt
bien qu'il ne pouoit escrire à l'encontre,
sans s'opposer au General de l'ordre, & au
Prouincial de Toledé, & à vn corps de Iesui-
tes qui auoient approué ce liure. Et mainte-
nant qu'il void que par la mort du Roy les
Iesuites sont chargez d'une haine vniuerselle
& qu'il se void pressé par la Court de Parle-
ment, & par la Sorbonne, il a escrit vne Epi-
stre Declaratoire, où il condamne voirement
Mariana: mais en terme si doux & si douteux,
qu'on voit biē qu'il a peur de l'offenser, disāt
seulement que c'est *une legereté d'une plume es-* Pag. 14.
soree, au lieu d'accuser la personne d'Herésie,
& de trahison perfide, & barbare, & la do-
ctrine d'impieté, & inimitié contre Dieu &
les hommes. Et quand mesme il reprendroit
Mariana, comme il faut, si est-ce que c'est
(cōme dict l'Abbé du Bois) apres la mort le
Medecin. Et falloit auoir escrit lors que le
Roy le luy commāda, & ne l'aïsser point en-
raciner ceste oppinion dans l'esprit du peu-
ple, laquelle luy a cousté la vie peu d'annees

apres: mais venons à d'autres exemples.

Il y a encore deux mille tesmoins dans Paris, qui certifieront que Iaques Clement han-
toit ordinairement les Iesuïtes, & que quel-
ques-vns d'entr'eux l'accompagnerent ius-
ques hors des tranches, quand il sortit de
Paris pour faire son coup. Et trois mois apres
fut publiee à Paris vne harangue du Pape
Sixte, prononcee en plein Consistoire l'on-
zième de Septembre 1589. En laquelle est
accomparé l'assassinat de Iaques Clemēt aux
mysteres de l'incarnation & resurrection, &
aux exploits d'Eleazar & de Iudith. Et apres
auoir exaggeré les crimes du Roy occis? Il
adiouste, *Propter hac & similia manifesta impæni-
tentis iusticia decreuimus pro ipso non esse celebrandas
exequias. &c.* C'est à dire: Pour tels & semblables
signes enidens d'impenitēce nous auons ordonné qu'on
ne face pour luy aucunes obseques. Puis conclud par
vne priere à Dieu, à ce que *quod misericorditer
hoc modo cœpit benignè prosequatur*, il vueille pour-
suiure benignement ce qu'il a ainsi commencé miseri-
cordieusement. Et est ceste harangue imprimée
à Paris chez Nicolas Niuelle, & Rollin
Thierry, Imprimeur de la sainte Vnion,
auec l'aprobation de trois Docteurs, Boucher,
Decreil, Ancelin, non que ie vueille croire que
iamais paroles si impies ayent esté dites par le
S. Pere; ains sans doute c'est vne pure impo-
sture: & ne faut point douter, que tant les Ie-
suïtes, que quelques autres Docteurs & Reli-
gieux qui estoient alors consentans auec les
Iesuïtes, ont forgé ceste piece pour rendre ce

meurtre loüable, & inciter quelque autre à tuer le Roy successeur du defunct. C'estoit le mesme temps auquel Iean Guignard Prestre Iesuite demeurât à Paris au College de Clermont escriuoit vn traicté en la loüange de Iacques Clement, & des exhortations à tuer le feu Roy. Ce qui a paru depuis, & trop manifestement au proces, qui a esté faict audict Guignard. Et voicy comment Dieu le permit. Comme Messieurs de la Cour traualloient au proces de Iean Chastel, aucuns d'iceux deputez pour ce faire s'estans transportez au College de Clermont, se saisirent de plusieurs papiers, entre lesquels fut trouué vn liure escrit de la main dudit Guignard Iesuite, contenant plusieurs propositions & moyens pour prouuer qu'il auoit esté loisible de tuer le Roy, avec plusieurs inductions pour faire aussi tuer son successeur. En voicy quelques vnes extraictes dudit liure qui se trouue encôres au Greffe de la Cour. *Que le Neron cruel a esté tué par vn Clement, & le Moine simulé depesché par la main d'vn Vray Moine.*

Que l'acte heroiqne faict par Iacques Clement, comme don du S. Esprit, appelé de ce nom par nos Theologiens, a esté iustement loué par le feu prieur des Iacobins, Bourgoin Confesseur & Martyr, par plusieurs oraisons, tant à Paris lors qu'il enseignoit sa Iudich, que deuant ce beau Parlement de Tours.

Que le Bearnois, ores que conuertý à la foy Catholique seroit traicté plus doucement qu'il ne meritoit si on luy donnoit la couronne Monachale: Que si on ne le peut depôser sans guerre qu'en guerroye. Si on ne peut

faire la guerre qu'on le face mourir.

La Cour ayant veu ses escrits, Guignard auteur mandé & interrogé sur iceux, à luy representez a recogneu les auoir composez & escrits de sa main: Et pource la Cour par Arrest executé le 7. de Ianuier 1595. a déclaré ledit Guignard Iesuïte atteint & conuaincu du crime de leze Maïesté, l'a condamné à faire amende honorable, nud en chemise, la corde au col, deuant la principale porte de l'Eglise de Paris, puis estre pendu & estranglé en Greue, & son corps bruslé.

Le Lecteur s'enquerra, s'il luy plaist, s'il se trouua iamais Iesuïte qui ait condamné ce Guignard de trahison & perfidie. Au contraire Richeome en son Apologie l'excuse, tant qu'il peut: disant que Guignard traictoit les susdites propositions, comme par forme de dispute en Theologie. Et en cela nous sommes d'accord: car aussi ie dy, que *tuer le Roy* a tousiours esté vne des resolutions de la Theologie des Iesuïtes. Si quelque Iesuïte, demy par force, demy par honte le condamne, c'est pour n'auoir pas esté assez discret, ou pour auoir mal pris son temps, ou pour quelque semblable raison.

Ce qu'on peut recognoistre, en ce que les Iesuïtes ont mis ce Guignard au Catalogue de leurs Martirs, qu'ils ont faict imprimer à Rome, en deux formes, en l'vne desquelles Guignard y est, en l'autre il n'y est point, afin qu'il y eust des copies qu'on peust vendre en France sans danger. Aussi le Iesuïte Bonar-

scius au 8. chap. de son Amphitheatre, exalte
 iuisque au ciel ce Guignard, quoy que sans
 le nommer, de pœur d'offenser nostre Roy,
 toutesfois assez clairement, pour le discerner
 en ces mots: *Te tairay-ie ô estoille luisante au ciel*
En terre, & derniere expiation de la maison, qui
apes cela ne deuoit plus rien souffrir? Nul iour n'es-
facera les traces de ta mort: Puis adiousté, Toute la
France se ioin dra à mes vœux: Cela ne peut con-
 uenir qu'à Guignard, qui estoit Iesuïte Fran-
 çois, & qui est le dernier Iesuïte qui a souf-
 fert supplice en France.

De mesme boutique en mesme temps est
 sorty vn liure, detestable intituié, de *iusta*
Henrici terrij abdicatione: De la iuste degradation de
Henry 111. Liure dont on ne sçait l'Authœur,
 sinon qu'il a esté imprimé à Lyon, ayant au
 front la marque des Iesuïtes.

Franciscus Verona Constantinus, a escrit vne
 Apologie pour Iean Chastel qui surpasse en-
 cores le liure de Mariana en abomination,
 ou au 2. chap. de la II. partie, il afferme que
 nonobstant le decret du Concile de Constance, il est
 loisible à chasque particulier de tuer les Rois, & les
 Princes condamnés d'heresie & de Tirannie. Or
 on void par l'exemple de nos deux derniers
 Rois, qu'on fait accroire aux Princes qu'on
 veut tuer, qu'ils sont Heretiques, ou fau-
 teurs d'Heretiques, sous ombre qu'ils ne
 veulent mettre eux mesmes le feu en leur
 Royaume, & y allumer la guerre ciuile pour
 gratifier l'Espagne, ou quand ils prestent se-
 cours à leurs voisins, de peur qu'ils ne soient

Taceboe-
 gote cla-
 rum celo
 terraq; si-
 dus, & vlti-
 mum nil
 amplius do-
 lituræ do-
 mus inno-
 cuum pia-
 mentum
 Nullus cui
 sanguinis
 vestigia
 dies exte-
 ret totaq;
 in hæc vota
 mea ibit
 Gallia.
 Quod non
 obitante
 decreto
 supradicti
 Concilij
 Constan-
 tienfis
 Priuaris &
 singulis
 licitam sit
 Reges &
 Principes
 hæreseos &
 Tyrannidis
 cōdēatos
 occidere.

empietez par la maison d'Austriche: Ainsi faisoit Cyclope dans Homere, qui n'ayant aucune raison de méfaire à Vlysses & ses compagnons, & les voulant manger, leur faict accroire qu'ils sont Pyrates.

Vulnerado
Henrycum
Borboniū,
non volue-
rit laedere
aut occide-
re Regem,
etiam si se-
ralē dice-
bat, & in
quo præter
imaginem
nihī Regij
quā quod
genere Re-
gio ortus
erat. Clerici
rebellio in
Regem, nō
est crimen
legē Maie-
statis, quia
non est sub-
ditus Regi.
Summus
Pontifex
clericos
exemit à su-
bjectione
Principum.
Non sunt
amplius
Reges cle-
ricorum
superiores.

En la mesme Apologie est approuué le par-
ricide de Iacques Clemen, comme fait, *Contra
hostem publicum & iuridice condemnatum*, contre
vn ennemy public & iuridiquement condamné.

Là mesme au cha. 3. il defend l'acte de Iean
Chastel, & dict, qu'en blessant Henry de
Bourbō, son intention n'a pas esté de tuer le
Roy, encores qu'il se dist estre Roy, veu qu'il
n'auoit rien que l'apparence de Roy, & qu'il
estoit du sang Royal: Adiouste, *Que Henry de
Bourbon ne pouuoit estre appellé Roy, mesme depuis sa
reduction à l'Eglise Catholique.*

Emanuël Sa Iesuite, en ses Aphorismes des
Confessions, au mot *Clericus*, dict que, la rebel-
lion d'vn Clerc contre le Roy n'est point crime de leze
Majesté, d'autant qu'il n'est point sujet du Roy.
Bellarmin de mesme, au 28. chap. de *Clericis*. Le
Souverain Pontife a exempté les Clercs de la subie-
ction des Princes: Les Rois ne sont plus les superieurs
des Clercs: Considérez la malice: On demande
s'il est permis à vn sujet de tuer son Roy,
ou se rebeller contre luy, sous ombre qu'il
est Tyran. Sur ceste demande, les Iesuites
craignans de parler trop rudement, & se ren-
dre odieux, en disant qu'vn Clerc peut tuer
vn Roy, disent seulement que les Clercs ne
sont point sujets des Princes, & de là tirent
tout doucement ceste conclusion, que donc

ils ne peuuent estre estimez coupables de crime de leze Majesté, puis que celuy contre lequel ils conspirent n'est point leur Maistre ny leur Superieur.

Henry Garnet Iesuite, avec Halle son cōpagnon, autrement appellé Oldecorne, ont esté executez en Angleterre, pour auoir tréppé en la trahison des rebelles, qui auoyēt fait vne mine de poudre à canon, sous la maison où se tenoient les estats, afin de faire voler en l'air le Roy & toute sa famille, & tous les deputes des Prouinces là assemblez. Garnet donc ayāt esté pris sur la deposition d'un des complices, nie constāment, & avec sermens, auoir rien sceu de la conspiration: Mais les iuges voyans qu'ils ne gaignoyent rien par menaces, s'auisēt d'une ruse: Ils mettent vn autre Iesuite nommé Halle, pareillement coupable dās le cachot prochain de Garnet, & instruisent le Geolier de consoler & faire tous bons offices à Garnet, & l'aduertit que son compagnon Halle estoit au prochain cachot, & qu'il y auoit vn pertuis entre les deux cachots, par lequel ils pourroyent communiquer ensemble: Ce qu'ils faisoient tous les iours: mais le Geolier auoit mis quelques vns en vn endroit par lequel ils entendoient leurs deuis secrets, & descouuroient entre eux ce qu'ils auoyent nié aux Iuges. Sur celà r'appellé deuant les Iuges, & se voyant descouuert, confesse voirement auoir sceu l'entreprise: mais qu'elle luy auoit esté reuelee en confession, laquelle il ne deuoit reueler.

Luy furent aussi confrontez des tesmoins qui deposoyent qu'en vn Sermon qu'il auoit faict entre des Catholiques, il les auoit exhorté à prier Dieu, qu'une affaire grande & dāgereuse qui estoit achēminee, eust vn heureux succes pour l'Eglise Catholique.

Enquis donc pourquoy il auoit si constamment nié ce qui se trouuoit estre vray, respondit qu'estant enquis, s'il auoit rien sceu de la conspiration, il auoit dict voirement qu'il n'en auoit rien sceu, mais qu'il auoit sous-entendu en son esprit ceste restriction, *Ie ne l'ay pas sceu pour vous le dire*. Et mesme recogneut qu'il auoit fait publier vn liure d'equiuocations, prescriuant les moyens de tromper les iuges en paroles, & eluder par ambiguité toutes leurs interrogations.

L'approbation est au commencement du liure.

Cum quis nullis in iudiciis ius vocatur quia nemo tenetur se ipsum Magistratui prodere, idq; ex natura satis docet aperte & liberē

Pour ce Venerable Garnet, vn Iesuite nomme Iean l'Heureux, mais qui deguise son nom en forme Hieroglifique, s'appellant *Andreas Eudemoniohannes Cidonius*, a faict tout de nouueau vne Apologie imprimee à Colōgne chez Iehā Kink l'an 1610. avec approbation du general Aquaiua, & de trois autres Docteurs Iesuites, où il soustient fort & ferme qu'il est permis de tromper en iustice les Iuges, par equiuocations. Item qu'un Prestre, pour quelque cause que ce soit, y allast il de la mort du Roy, & de la subuersiō de la Republique, ne doit point reueler vne cōfessiō.

Sur le premier poinct, voicy ce qu'il dict en la page 38. *Quand quelqu'un est tiré en cause sous vne iustice inuiste, pource que nul n'est tenu de se de-*

ferer soy-mesme au Magistrat, & la loy de nature le monstre appertement, Il peut nier ouuertement, & librement sans aucune terguersation, ce pourquoy il est appelé, pource que tousiours il sous-entend ceste clause, Je sois obligé de le dire. Notez aussi qu'il appelle la iustice des Rois d'Angleterre agissante contre les Iesuites Anglois vne iurisdiction iniuste, comme s'ils n'estoient point obligez à comparoistre deuant.

Martinus Nauarrus Aspilcueta Espagnol forty de la mesme eschole, a escrit vn liure expres des equiuocations, ou en la page 352. Il dit qu'il est loisible à vn homme de dissimuler qu'il est Catholique. Et ailleurs il approuue la response de celui. *Qui enquis par les sergens, si vn meurtrier qu'on poursuiuoit n'estoit point passé par là, mit sa main dans ses manches, iurant qu'il n'estoit point passé par là.* Puis adiouste. *Ceste doctrine des Equiuoques est fondee sur l'exemple memorable de saint François.* Qui est certes faire tort a la vertu & sainteté de ce saint personnage, luy attribuant l'inuention de tromperie & mensonges si abominables.

homicida transisset? immixtis manibus intra manicas, respondit hac non transiuisse, sub intelligendo tacite contra communem intelligentiam non transiuisse per illas manicas.

Le mesme André Endremoniohānes Cydonius, en la page 40. s'appuye de l'autorité de Syluester, en la 5. accusation, questiō 13. où il dit, *Quand le Iuge ne procede pas iuridiquement, soit pource que l'accusé ne luy est pas simplement suies, ou en ce cas, ou pour quelque autre cause: alors*

sine vlla terguersatione negare potest id cuius gratia accersitur, quia semper clausula illa intelligitur, vt teneat dicere.

Nauarrus indecr. C. humanæ aures. 21. quæst. 5. pag. 348. franciscus interrogatus à licitoribus homicidam, an illac ubi S. Franciscus erat talis

Quando iuridice non procedit, vel quia accusatus ei non est subiectus simpli-

hoc casu,
aut quacū-
que alia de
causa, tunc
licet men-
daciū sit illi-
citurū, non
tamen est,
mortale,
quia nec
cōtra debi-
tū iustitiæ
nec est iniu-
dicio vero,
sed in vsur-
pato Immo
nō erit etiā
veniale si
responden-
do cautelo-
sē & vt
aiunt sophi-
sticē dicat
aliquid fal-
sum apud
sensem iu-
dicis &
apud suum
verum.
Si crimen
omnino
occultum
est de quo
quis inter-
rogatur,
tū equi-
uocatione
vri poterit,
responden-
do nescio,
intelligen-

encores que le mensonge soit illicite: toutesfois ce n'est point vn peché mortel: pource qu'il n'est point contre ce qu'on doit à la iustice, ni en vray iugement, mais qui est vsurpé: Voire le mensonge ne sera pas mesme peché veniel, si en respondant cauteleusement & cō-
me l'on dit sophistiquement, il dit quelque chose qui est faux, selon le sens du Iuge, mais qui est vray selon le siē: pource qu'en cas, ven qu'il n'est pas son suiet, il n'est pas obligé de dire la vérité à son intention:

Faut entendre que par ce iugement qui n'est pas vray iugement, ains vsurpé sur ceux qui ne sont pas ses suiets il entend le iugement des Magistrats ciuils sur les Clercs & principalement sur les Iesuïtes qui ne sont pas mesme suiets aux Euesques.

Le Iesuïte Tolet. au 4. liu. de l'instruction des Prestres chap. 21. si le crime, dit-il, est occulte sur lequel quelqn' vn est interrogé, alors il pourra vser d'equiuocation, respondant, le ne le scay pas, mais sous-entendant en son esprit pour vous le dire. Ou en respondant, le ne l'ay point fait, mais entendāc en soy mesme **MAINTENANT.**

Les anciens Ariens ont frayé ce chemin aux Iesuïtes. Car Nicephore au 8. liure de son histoire au ch. 51. dit qu'Arrius ayant souscrit de sa main à la confession de foy du Concile de Nice auoit vne autre confession contraire cachee en son sein qu'il auoit luy mesme es-crite. Et qu'il iura al'Empereur qu'il croyoit comme il auoit es-crit: mais il entendoit parler de l'es-crit qu'il auoit au sein.

Par ceste doctrine vn hōme pourra renier sa religion, & la foy en Dieu disāt à vn iuge qui

l'interroge, iene croy point en Iesus-Christ: mais sous-entendant en soy-mesme. Pour vous le dire. Et S. Pierre reniant Iesus-Christ deuant vne chambriere pouuoit s'excuser par vne telle subtilité, disant, Non iene le cognois point, Puis tout bas: pour te le dire.

do tamen
intra se. &
dicam tibi.
vel respon
dendo non
feci intelli
gendo in
tra se. nunc
non feci.

Par ceste finesse les Iesuites ont trouué moyen d'asseurer ceux qu'ils incitent à entreprendre contre la vie des Roys, ou leur donner vn moyen de ne releuer iamais leurs cōplices: car ils leur disent, Vous vous sauueriez par telles & telles equiuocations, & nierez en auoir rien sceu, ny rien veu: mais vous sous-entendrez quelque condition ou correction tacite en vostre esprit qui vous exemptera de mensonge, par ce moyen vous n'offencerez point vos consciences. C'est ce qui rend les parricides des Roys si resolués à nier & se parjurer en Iustice, pour ce qu'ils sont instruits qu'en ce faisant moyennant qu'ils sous-entendent quelque chose en leur esprit ils n'offensent point Dieu.

Dont aussi s'ensuit qu'on ne peut asseoir aucun ferme iugement sur la protestation que fait le Pere Coton de desaduouier Mariana. Car qui sçait s'il n'a point quelque retention cachee, ou qui sçait s'il dit. Je condamne le liure de Mariana, mais en sous-entendant Pour ce qu'il n'en a pas assez dit? Ou plustost ainsi. Vn particulier ne peut legitimement attenter à la vie d'un Roy. Puis tout bas, Que le Pape approuue, ou qui n'est pas excommunié, ou qui est vrayment Roy. Mais tel & tel n'est pas vrayment Roy, puis qu'il fait cecy & cela, &c. Bref comme es contracts

on faisoit autrefois renoncer les femmes au *Senatus-consulte Velleian*, & à l'autentique *si qua mulier*, ainsi falloir-il que le P. Cotton s'il vouloit estre creu en ceste déclaration, renonçast premierement au priuilege de mētir, & vser d'equiuocation, & encores craindrois-ie qu'en ceste mesme renonciation, il n'employast, quelque pareille soupplēse & ambiguité.

Adde Ca-
tholicorū
scandalū, &
offensionē
si sacerdos
idemque
Iesuita cō-
sciētiae cau-
sa cōsultus
idque inter
posita con-
fessionis re-
ligione qua
nulla maior
inter Catho-
licos esse
potest con-
sultores
suos detū-
lisset? quem
enim in po-
sterum in
rebus suis
dubiis ad-
ire, aut cui
amplius fi-
dere pos-
sint, sine in-
sacerdoti-
bus quidē

L'autre point soustenu par ce Iean l'Heu-
reux Iesuite, est que Henry Garnet Iesuite,
& ses compagnons ayans apris la conspira-
tion contre la vie de leur Roy, & de toute sa
maison, ne deuoyent aucunement la reueler,
ains la tenir cachee. Voicy ce qu'il en dit en
la page 262. de son Apologie: *Adioustez le scan-
dale des Catholiques, si vn Prestre, & iceluy Iesuite
estant enquis sur vn cas de conscience, & ce en y in-
terposant l'action religieuse de la confession (qui est
la plus sacree qui soit entre les Catholiques) eust de-
feré ceux qui luy demandent conseil: Car à qui s'ad-
dresseroient-ils deormais en leurs doutes, où à qui se
pourroyent-ils fier, si mesme és Prestres ils ne trou-
uoyent point de fidelité? Et en la page 290. Vne
chose sceellée du tres-sainct cachet de la confession, ne
pouuoit estre descouuerte sans vn horrible sacrilege.*
Et tout le 13. chapitre est employé à cela, où
il en reuiert là, que *Nullum tantum potest esse
malum cuius vitandi causa confessionem prodere li-
ceat. Il n'y peut auoir de mal si grand, que pour l'e-
uiter il faille reueler la confession.* Le Iesuite Suares
dit le mesme au traitté de la pœnitence, *Voire
mesme (dit-il) quād il y iroit du salut de la Republ,*

Tout de fraische memoire, & depuis la mort du Roy, le Pere Fronton Iesuite, quoy que moins seditieux que les autres, accompagné d'un autre Iesuite, vindrent nagueres en la Bibliotheque du Roy, qui est aux Cordeliers, & y trouuerēt Monsieur Casaubō qui à la garde de la Bibliotheque, avec lequel estās tombez sur ce propos, Fronton luy soustint fort & ferme qu'il vaudroit mieux que to^s les Rois fussēt tuez, que de reueler vne cōfessiō.

Quoy donc, vn fils laissera-il plustost tuer son pere, que de luy reueler qu'il a appris en cōfessiō qu'un tel, ou tel l'espie pour le tuer? Ou vn Iesuite laissera-il tuer son Roy, & replir de sang tout son pais, plustost que de reueler vne Confession? Mais on dira, vn Confesseur doit estre fidele enuers ceux qui viennent à luy à confesse, cela est vray. Mais aussi ie dis, qu'il doit estre encores plus fidele enuers Dieu, & enuers son Roy, auquel Dieu veut que nous obeissions, & auquel nous auons presté serment de fidelité. Que si nous recherchons les liures sacrez sur la diuine parole, nous trouuerons bien quantité de passages qui cōmandent la fidelité & obeissance enuers les Rois: mais nous n'en trouuerons point qui recōmandent le silence apres la cōfession: C'est vn commandement de l'Eglise qu'il faut obseruer: mais en sorte qu'il ne preiudicie point au commandemēt de Dieu, & se donner de garde d'estre traistre, afin d'estre taciturne, & par vn silence perfide estre cause de la mort de son Pere ou de son Roy:

ueniant Ré
sacrosācto
cōfessionis
arcano ob-
signatā sine
immani
sacri legio
prodi non
potuisse.
Suarius de
pœnitent.
disput. 33.
secre. 1. num.
2. in nullo
casu & pro-
ster nullum
finem etiā
protota-
tuenda Re-
publica ab
ingentima-
lo tempo-
rali & spiri-
tual violia-
re illud li-
ceat An-
dræas Eudæ
m. pag. 335.

Homer. II.

l. i. §. ecci-
foram cum
se qq ff. ad
S. C. Sylla-
nia.l. 9. §. i. ff. ad
leg. Cornel
de fals. l. i.
Cod. de fal-
samon l.quisquis
Cod. ad leg.
Iul. Mareff.Idem in ca.
quantæ de
sentent ex
commu ca
delicto de
sentent. ex-
cōmunic.in 6. Cano.
uō inferēda
23. quæst. 3.

Côme si ie disois, voylà vn homme qui s'en va mettre le feu dans la maison de mon frere, ou de mon voisin, pour brusler sa femme & ses enfans, mais ie le laisseray faire, pource que i'ay promis de n'en parler à persōne. Au contraire, il faut croire qu'en telles obligations la preuarication est loüable, voire mesmes agreable à Dieu: car celui qui pouuant empescher vn mal, souffre qu'il se face, en est réputé coupable: Et pour ceste raison, Homere tout au commencement de son Iliade, dit que la cholere d'Achilles contre Agamēnon auoit tué beaucoup de vaillās hommes, & auoit dōné leur corps en proye aux chiēs: Et de là vient que par les loix Romaines, telle patience est punie de mesme peine que celui qui a commis l'acte. Ce qui a lieu non seulement en crimes commūs, mais particulièrement, & principalement és crimes de leze Majesté, comme enseignent les Iuriconsultes: Et afin que quelque Marianiste ne puisse dire, que les auteurs de telles Loix estoient Payens. Sur ce sujet les Papes ont tousiours cy-deuant tenu la mesme iurisprudēce, avec tous les Canonistes, qui adioustent pour raison, qu'il y a grande apparence de societé occulte entre le delinquant: & celui qui le pouuant empescher le souffre.

Ce Iesuite donc, & le Cardinal Bellarmin ont tort de iustifier Garnet & Oldecorne Iesuites, comme s'ils auoyent bien fait. Consideré mesmes qu'outre les choses susdites, lesdits Iesuites pouuoient bien sans accuser

personne, ou par quelque mot d'escriit faire aduertir le Roy qu'il prist garde à sa personne, & fit foüiller sous sa maison: & par ce moyen la conspiration eust esté descouuerte sans reueler la confession.

La source & l'origine de tout le mal vient du vœu que font les Iesuites, par le quel ils promettent d'obeir à leurs Superieurs, c'est à dire, aux Generaux de leur ordre, qui par nécessité doiuent estre sujets du Roy d'Espagne, & à leurs autres Superieurs, d'une obeissance simple & absoluë, & sans aucune exception, ny mesme sans s'enquerir pourquoy: Ce qu'ils appellent obeissance, non seulement de *volonté*, mais aussi de *iugement*, & une *obedience au eugle*. Il y a vn petit liure intitulé, *Regula Societatis Iesu*, qu'eux-mesme ont fait imprimer à Lyon, l'an 1607. chez Iacques Roussin: a la fin duquel ils ont mis vne lon-

gue Epistre d'Ignace Loyola, soldat Espagnol, Patron & auteur de la secte: En laquelle ledit Ignace en la page 254. donne ces reiglemens à la société: *Superioris Vocem ac Iesu non secus ac Christi Vocem excipite: RecueZ la parole & les commandemens de vostre Superieur, non autrement que la voix de Christ. Et peu apres: Tenez-en vous mesmes, que tout ce que le Superieur vous commande est le commandement de Dieu mesme. Et tout ainsi que pour croire les choses que la foy Catholique propose, vous y estes incontinent portez de tout vostre cœur & consentement, ainsi pour faire toutes les choses que vostre Superieur commande, il faut que vous y soyez portez d'une certaine auen-*

Statuarius
vobiscū ip
quicquid
superior
præcipit
ipsius Dei
præceptum
esse atque
ut ad cre-
denda quæ
Catholica
fides pro-
ponit toto
animo affe-
ctūque ve-
stro statim
incumbitis.
Sic ad ea

facienda
quacum-
que supe-
rior dixerit
cæco quo-
dā impetu
voluntatis
parendi cu-
pidæ fine
vlla prorsus
disquisitio-
ne fera-
mini.

gle impetuosité de volonté desirouse d'obeïr sans vous enquerir pourquoy? Et afin que quelqu'un ne trouue vn eschapatoire sur ce mot de (*quodā*) certaine impetuosité, en la mesme epistre, il y a d'autres lieux où ce mot est oublié. Comme quand il dit, *perit celebris illa obedientia cæca simplicitas, &c.* Car d'autant que les choses que les superieurs commandent pourroient quelquefois sēbler iniustes & absurdes, ce Sainct non canonisé commande aux Iesuites de captiuer leur iugement, & ne s'ingerer en l'examen des commandemens des superieurs: à l'exemple (dit-il) d'Abraham, qui voulut sacrifier son fils, Dieu l'ayant commandé. Et de Iean l'Abbé qui arrosa vn an entier vne buchette de bois sec sans profit, & qui se mit tout seul à pousser vne grosse pierre que plusieurs hommes ensemble n'eussent peu remuer, non qu'il estimast ces choses vtilles ou possibles, mais pource que son superieur luy auoit commandé.

Ceste regle en reuiēt là, que si les chefs de l'ordre des Iesuites, desquels le General est tousiours sujet du Roy d'Espagne commandent à quelque ieune Iesuite François quelque chose que ce soit, il doit l'exécuter sans auoir esgard si c'est chose dāgereuse ou difficile, ou preiudiciable à l'Eat. Maxime laquelle posce fait que la vie de nos Rois n'est asseuree qu'autāt que les chefs de l'ordre des Iesuites, ne commanderont point à leurs disciples ou sectateurs d'entreprēdre dessus. Car cela leur estāt cōmandé il leur est defen-

du de s'enquerir si la chose est iuste. Le commandement qu'on leur en fera sera fondé sur le bien de l'Eglise, sur la satisfaction pour quelques pechez enormes, sur l'esperance d'estre couronné du Martyre, & auoir au ciel quelque dignité par dessus le commun.

Ce mesme vœu est cause que les Iesuïtes sont exempts de l'obeissance des Euesques: car il eust esté impossible d'obeyr à leurs superieurs Iesuïtes en toutes choses, si les Euesques eussent eu le pouuoir de corriger ou empescher ce que les superieurs des Iesuïtes auroient commandé.

Quelqu'un peut-estre me dira, ces choses sont voirement assez claires, & voilà des témoins assez pour asseoir son iugement & recognoistre la creance des Iesuïtes. Mais d'où vient donc qu'en quelques endroits ils condamnent les meurtres des Roys, & soustiennent qu'un suiet ne doit attenter à la vie de son Roy, encôres qu'il soit vicieux & abuse de son pouuoir? Je respons que là croyance voiremēt de quelques Iesuïtes est qu'un suiet ne doibt se rebeller contre son Roy, quoy que Heretique ou Tyran, deuāt que la sentence de deposition soit prononcee par le Pape ou par les Doctes, entre lesquels ils s'estiment les premiers, & que par declaration expresse les suiets soient dispensez du sermēt de fidelité, comme enseigne bien au long Iesuïte Andreas Eudæmono-ioānes au troiesme ch. de son Apologie de Henry Garnet. Mais aussi ils tiennent tous que depuis ceste

sentence de deposition, laquelle se fait par la suggestion de ses Peres, vn tel Roy n'est plus Roy, & qu'vn autre doit empieter sa place, & que les subjets ne luy doiuent rendre aucune obeyssance: Celà est monstré bien au long par le mesme Iesuite, au mesme chap. & auons monstré cy-dessus que c'est la doctrine de Bellarmin, & de Gretzer Iesuites. Et toute la France l'a senty par experience, à son grand mal-heur. Or ie dis que quicōque soustient que le Pape peut donner & oster les Royaumes à qui il luy plaist, & exempter les François du serment de fidelité, dit par consequence necessaire que les François doiuent tuer leur Roy. Car on sçait bien qu'vn Roy auquel on voudra arracher son Royaume, prendra les armes pour maintenir son droict: & taschera de ranger ses suiets qui se sont armez cōtre luy. Or en ceste guerre & parmy tant de suiets armez contre luy, il est impossible que le Prince ne coure danger de sa vie, puis qu'en se defendant il est resolu de ne perdre son Royaume qu'avec sa vie. Ce sont subtilitez Iesuitiques dont ils endorment les hommes. Ils protestent de n'approuuer point les meurtriers des Rois; mais aussi ils ne recognoissent pour Rois que ceux qu'il leur plaist; & tiennent que tuer vn Roy qu'ils haïssent, n'est pas tuer vn Roy, mais vn homme qui n'en a que le masque & l'apparence.

Voicy encores vn autre mal par lequel ils sont conuaincus d'estre ennemis de la cou-

ronne de nos Rois : Car les François n'ont
 iamaïs voulu recognoistre que la couronne
 du Royaume de France dépendist du S. Sie- *Romanus*
 ge, ny que le Pape peust donner & ôter la *Pontifex*
 couronne de France, à qui il luy plairoit: Et *Zacharias*
 n'a iamaïs approuvé le Canon *Alms*, qui est *scilicet Re-*
 en la cause 15. du Decret, en la 6. question, *gem Fran-*
 qui est tel: *Zacharie Pontife Romain a déposé le Roy tampro suis*
des François, non tant pour ses iniquitez, que pource iniquitati-
qu'il n'estoit pas propre ou capable d'une si grande bus quam
puissance: & a mis Pepin Pere de Charler Empereur pro eo
en sa place, & a absous tous les François du serment quod tanta
de fidelité: Par lequel Canon le Pape s'attri potestati
buë de pouuoit ôter la couronne à nos Rois, eratinutilis
 sans auoir esgard s'ils sont Heretiques ou *à regno de-*
 Catholiques: s'ils sont de vie innocente ou *posuit, &c.*
 vitieuse: mais si seulement il iuge qu'ils foient
 incapables, & s'il s'en trouue quelqu'un plus
 capable de regner. Quiconque tient ceste
 opinion, tient que nos Rois ne sont que ti-
 tulaires, & que c'est au Pape de disposer de
 la couronne selon sa volonté.

Or les Iesuites tiennent que les Papes ne
 peuuent errer en la doctrine, & maintiennent
 iusques à vn point tout ce qu'ils ont ensei-
 gné, & par consequent croient que le Pape
 prononçant ce Decret a dict la verité.

I'adiousteray encor ce point de la doctrine
 des Iesuites, qui fera iuger de leur humeur.
 Au procès de Garnet Iesuite, entr'autres
 choses qu'il confesse, il recognoist que Ca-
 tesby chef de la conspiration, fut touché
 d'un remors de conscience, pource qu'estant

prest de faire iouër la mine, il considéra que
 faisât voler la maison ou estoient assemblez
 les Estats, il feroit avec les Heretiques mourir
 aussi plusieurs Catholiques innocens.
 Pour se resoudre là dessus, il s'adresse au Ie-
 suite Garnet, & luy demande si pour faire
 mourir les meschans, on pouuoit iustement
 faire mourir quelques gens de bien parmy:
 Garnet luy respōd qu'il ne falloit point faire
 de conscience de tuer & les vns & les autres,
 pourueu qu'il en reuint du biē à l'Eglise Ca-
 tholique. Peut-on trouuer vne rage plus de-
 sesperée, que de celui qui pour tuër les Rois
 n'espargne pas mesme ses freres & ses amis.
 Or cela, ie dis, non point seulement fondé
 sur le tesmoignage du proces du Iesuite Gar-
 net, inais sur la confession mesme des Iesui-
 tes, qui depuis sa mort ont escrit à sa louan-
 ge: Car l'Apologie de Garnet, fait par le Ie-
 suite Iean l'Heureux, sus allegué, approuuée
 par le General Aquauia, & par trois do-
 cteurs Iesuites, conferme celà mesme, & de-
 fend le fait de Garnet en la page 103. Et en la
 page 265. il confesse que Garnet es prieres
 publiques, exhortant le peuple de prier Dieu
 pour le succès de l'entreprise, qui estoit assi-
 gnée à l'ouuerture des Estats. Et en la page
 269. il confesse que le Iesuite Halle estant
 pris & interrogé, disoit qu'il ne falloit point
 par le malheureux succès de l'entreprise iu-
 ger de la iustice de la cause. En la page 273. il
 recognoist que les rebelles ayās prins les ar-
 mes apres l'entreprise descouuerte, le Iesuite

Monet om-
 nes qui ad
 plemnem
 ecclesie
 carū con-
 uenerant
 ut obnixē
 orent Deū
 pro felici
 successu

Hamond, au lieu de les induire à déposer les armes prises cōtre le Roy, leur donna à tous l'absolution. Et en la page 275. il dit que tous ces traistres, *Erant religiosa admodum conscientia*, auoient vne conscience fort religieuse. La mesme Apologie en la page 310. tesmoigne que le Iesuite Garnet en certaines siennes lettres se resoluant à hazarder sa vie, dict: *Il est necessaire qu'vn homme meure pour tout le peuple*: Accommodant à sa personne les paroles que Carphe estant inspiré de Dieu a prophetisé touchant la redemption du peuple, par la mort de Iesus Christ. Au proces du mesme Garnet, il confesse aux Commissaires deleguez pour l'interroger, qu'il auoit offert sacrifices à Dieu, pour empescher ceste machination: toutesfois y adioustant ceste restriction, *si ce n'estoit que l'entreprise fut vtile à l'Eglise Catholique*. Là dessus, l'Apologie susdite l'excuse en ses propres mots, en la page 320. *Garnet n'approuuoit pas le faict, mais il en aymoit l'euenement*: Comme si ie disois qu'il n'approuuoit pas qu'on tuaist le Roy & sa famille, mais qu'il estoit bien aise que cela aduint: Ce sont ces subtilitez & souplesses de paroles, par lesquelles ils disent vne chose, & s'en dedisent en vne mesme ligne.

Voilà les faicts heroïques, pour lesquels Garnet & Oldecorne Iesuites, exécutés pour mesme trahison, sont appelez Martyrs par Bellarmin, & par ceste Apologie de Iesuite l'Heureux, approuuee par le General de l'ordre Aquaiua, & par trois Docteurs Ie-

grauissimè
cuiusdam
rei in caus
Catholico
rum sub
initium co
mitiorum.

Sacrilege
Iesuitique.

Neque ve
ro ob eam
rem factum
probabat
sed amaba
euentum.

suïtes, lesquels aussi sont inferez au Catalogue des Martyrs Iesuites, imprimé nouvellement à Rome, & dont la coppie s'est veüe, & vendue au Palais, en la galerie des prisonniers, mesmes depuis la mort du Roy.

Là dessus, les Rois & les Princes de la Chrestienté considereront meurement en quelle seureté ils peuuent viure desormais, puis que le peuple est instruit par ces Docteurs à chercher par des assassinats la gloire du Martyre. Et tous les bons Catholiques seront esmeus d'une iuste douleur, voyans ce sacré nom de Martyr tant honorable en l'Eglise, estre auourd'huy donné aux parricides des Rois & traistres de leurs Princes naturels.

Je laisse aussi à iuger à quoy tend la distinction de deux sortes de Catholiques que font ordinairement les Iesuites, appellans les vns vrais Catholiques, les autres Catholiques Royaux & Politiques : car ceux-cy encore qu'ils s'accordent avec l'Eglise Catholique, Apostolique Romaine, en tous les points de la foy, si ne sont-ils estimez que demy Catholiques, pource qu'ils ne sont point factieux, & n'approuuent point la trahison, ny la rebellion : distinction qui sans doute apportera quelque schisme en l'Eglise, si Dieu ny pouruoit par sa bonté.

Ces choses que nous auons produites en ce chapitre, tesmoignent assez que ce n'est point vn erreur de Mariana seulement, mais de tous les Iesuites : lesquels le P. Coton ne peut iustifier en general sans respōdre à tou-

tes les obiections susdites, tirees de tant d'autres liures, autant ou plus expres pour la tuerie des Rois, que le liure de Mariana.

Preuve de celà mesme, & par les faits des Iesuites.

CHAPITRE II.

NOUS auons suffisamment prouué par les escrits des Iesuites, que leur croyance generale est, qu'il est loisible aux particuliers de tuer les Rois: Montrons cela mesme par leurs actions, & par les effects horribles d'une si detestable doctrine.

Desia c'est vne grãde presomption que ceste secte a introduit ceste meschante doctrine, en ce qu'auant que ceste societé fust introduite, on n'auoit iamais ouy parler d'attêter à la vie des Rois, sous ombre de Religion. Voylà desia deux Rois cõsecutifs que la Frãce a perdu par ceste dãnable persuasiõ: tellement que si on n'y pouruoit, celà tournera en coustume.

L'experience nous a faict voir en France combien en vn Estat est pernicieuse ceste secte qui venue d'Espagne, il y a plus de 50. ans n'a peu encores amollir la durezza de son courage en la douceur de l'air François. Chose Ælian. de animal. li. 12. cap. 25. estrange! puis qu'autrefois les lyõs & les tygres amenez au temple d'Adonis en la Perse, n'y estoient pas si tost entrez que leur rage & cruauté naturelle se tournoit en vne mansuetude presque incroyable.

Que s'il plaisoit à la Royne & à Messieurs les Princes du sang, de s'informer exactement de Messieurs les Presidents & Conseillers de la Cour, ou des Aduocats & Procureurs generaux de sa Majesté, touchant les procédures tenües contre les Iesuites, ils apprendroient ce qui s'ensuit, que nous auons tiré des Arrests de ladite Cour, & des interrogatoires des criminels, qui sont encores gardez au Greffe d'icelle.

C'est qu'en l'an 1594. le 27. de Decembre Iean Chastel Escollier nourry au College des Iesuites, ayant donné au feu Roy, vn coup de coulteau dans la bouche, pensant luy donner dans l'estomach, fut pris & mis entre les mains du Preuost de l'Hostel, & mené es prisons du For-l'Euesque, ou estant interrogé dit, *y auoir long temps qu'il auoit pensé en soy-mesme à faire ce coup, & y ayant failly le feroit encor s'il pouuoit, ayant creu que cela seroit utile à la Religion Catholique Apostolique & Romaine.* De là mené en la Conciergerie du Palais, fut interrogé par les principaux officiers de la Cour ausquels il dit entre autres choses. *Qu'ayant opinion d'estre oublié de Dieu, & estant assuré d'estre damné comme l'Ante-christ il vouloit de deux maux euitier le pire, & estant damné ayroit mieux que ce fust vn Quatuor qu'vn Octo.* Enquis ou il auoit appris ceste Theologie nouvelle, à dit que c'estoit par la Philosophie. Interrogé s'il auoit estudié en Theologie, au College des Iesuites, à dit qu'ouy, & ce subsle Pere Guerer, avec lequel il auoit esté deux ans & demy. Enquis s'il auoit pas esté en la Chambre des Medita-

tions, ou les Iesuites introduisent les plus garāds pecheurs, qui voyoient en icelle Chambre les portraits de plusieurs Diables de diuerses figures espouuentables sous couleur de les reduire en vne meilleure vie, pour esbranler leurs esprits, & les pousser par telles resolutions à faire quelque grand cas, à dit qu'il auoit esté souuent en ceste Chambre des Meditations. Enquis si les propos de tuer le Roy n'estoient pas ordinaires aux Iesuiets, à dit leur auoir ouy dire, qu'il estoit loisible de tuer le Roy, & qu'il estoit hors l'Eglise, & ne luy falloit obeyr, ny le tenir pour Roy insqu'à ce qu'il fut approuué du Pape.

Pendant lesdites procedures, aucuns de Messieurs de la Cour s'estans transportez au College de Clermont où estoient les Iesuites, se saisirent des papiers de Iean Guignard Iesuite, entre lesquels fut trouué vn liure fait en la loüange de Iacques Clemēt, meurtrier de Henry III. & exhortant à faire le mesme à son successeur duquel liure nous auōs produit plusieurs clauses au premier chapitre.

La Cour ayant veu ses escrits, Guignard autheur mandé & interrogé sur iceux à luy representez reconnut les auoir composez & escrits de sa main. Et pource par Arrest de la Cour ledit Guignard fut executé à mort le 7. de Ianuier 1595.

Par autre Arrest a esté banni à perpetuité Pierre Gueret Iesuite, precepteur de Iean Chastel, & tous ses biens acquis & confisque au Roy, avec commandement de dresser vne Pyramide deuant la grande porte du Palais, avec vne inscription contenant les

causes du bannissement des Iesuites, où ils sont qualifiez heretiques, perturbateurs de l'Estat, & corrupteurs de la ieunesse. Laquelle Pyramide pendant qu'elle estoit debout, si quelques-vns ont demandé pourquoy elle estoit dressée, beaucoup plus de gens demandent auourd'huy pourquoy elle ne l'est plus.

Vn semblable fait estoit arriué à Melun le dernier d'Auril 1593. lors que le proces criminel fut fait à Pierre Barriere, lequel pris par l'aduertissement d'un bon Religieux & fidele au Roy, confessa qu'il estoit venu expres en Cour pour tuer le Roy, à quoy il auoit esté poussé par vn Iesuite nommé Varade, qui dechiroit tous les iours le Roy par mesdisance. Par la persuation duquel Iesuite iceluy Barriere auroit acheté vn couteau pour faire le coup. Dont ayant premieremēt demandé conseil à Aubry Curé de S. André des ares, à qui il auoit ouuert son intention, il s'adressa audit Varade Recteur du College des Iesuites par le conseil d'iceluy Aubry. Qu'il fut confirmé par ledit Varade en sa resolution de tuer le Roy, sur l'asseurance que ledit Varade luy donnoit, que s'il estoit pris & on le faisoit mourir, il obtiendrait au ciel la couronne de Martyre. Que ledit Varade l'auoit adiuré en le cōfessant, par le S. Sacrement de la confession & de la communion du corps de nostre Seigneur, de faire cest acte.

Fut aussi remarqué qu'apres la blessure du feu Roy, comme leurs Colleges furent enui-

ronnez de gardes, quelques Iesuites crioient aux portes des chambres. *Surge frater, agitur de religione. Leue toy frere il y va de la religion.*

Item furent trouuez au College desdits Iesuites plusieurs themes dictez par les regents des Classes, dont l'argument estoit vne exhortation à assaillir les Tyrans & à souffrir la mort constamment.

Fut aussi verifié que depuis la reduction de Paris en l'obeissance du Roy, les Maistres du College des Iesuites defendoient aux escoliers de prier Dieu pour le Roy.

D'ailleurs il y a eu informations faites contre Alexandre Hayus Iesuite Escossois, lequel auoit enseigné publiquement qu'il faloit dissimuler & obeyr au Roy pour vn tēps par feintise, disant fort souuent ces mots *Iesuita est omnis homo.* Estoit dauantage ce Iesuite chargé d'auoir dit souuent, qu'il desireroit, si le Roy passoit deuant leur College tomber de la fenestre sur luy pour luy rompre le col. Pour laquelle cause par Arrest de la Cour prononcé le 10. de Ianuier 1595. fut ledit Hayus banni à perpetuité, à luy enjoind de garder son ban à peine d'estre pendu & estranglé sans autre forme ne figure de procez. Ont esté aussi souuent conuaincus lesdits Peres d'auoir debauché des enfans pour les emmener en pays estrange contre la volonté de leurs peres. Notamment en l'an 1595. le 10. Avril, vn nommé Iean le Bel du College de Clermont fit amende honorable en la grand Chambre, l'Audience

tenant, teste & pied nuds en chemise, ayant en ses mains vne torche ardante de cire du poids de deux liures, & condamné à dire & declarer estant à genoux, que temerairement & comme mal aduisé il a voulu seduire & pratiquer François Veron escolier estudiant en l'Vniuersité de Poictiers, pour l'emmener hors du Royaume. En outre que indiscretement il a reserué & gardé par deuers luy, les leçons & compositions dictées par aucuns de ladite société, & par luy receuës & escriptes de sa main audit College de Clermont contenant plusieurs damnaibles instructions d'attenter contre les Rois, & l'approbation & loüange du detestable parricide commis en la personne du Roy de tres-heureuse memoire Henry III. Ces choses sont si publiques & si cogneuës que celuy qui y feindroit ou adiousteroit quelque chose ne pourroit esperer d'estre creu : & celuy qui les nieroit seroit estimé impudent. Ayant tout le corps de la Cour pour tesmoins de la verité de ces choses. Dauantage il n'y a personne qui n'ait remarqué par l'experience que les Iesuites n'ont iamais esté qu'ennemis iurez de nos Rois : Car durant ces troubles derniers qui ont cuidé transporter la France en Espagne il s'est trouué beaucoup de Religieux & de tous les ordres qui ont fuiuy le party du Roy. Mais il ne s'est trouué aucun Iesuite pour luy : iusques à ce qu'ils ayent esté pour leurs crimes chassés du Royaume. Bref le feu Roy Prince, qui n'auoit iamais eu

peur en guerre, auoit peur de ces gēs en paix. Monsieur le Duc de Sully peut estre tefinoin que dissuadant au Roy le rappel des Iesuïtes, le Roy luy respōdit, *Assurez moy donc ma vie.*

Que si nous sortons hors du Royaume de France nous trouuerons plusieurs exemples semblables. En toutes les conspirations contre feuë Elizabeth Royne d'Angleterre, il s'est tousiours trouué que quelques Iesuïtes y trempoient: laquelle encores ils deschirēt d'iniures apres sa mort, irritez de ce qu'elle ne s'est point laissée assassiner. Le Iesuïte Bonarscius en son Amphiteatre au 4. ch. du 1. li. l'appelle *lucā Anglicanam, la louxe Angloise*. Et le Iesuïte Eudæmoniohannes en la pa. 116. de son Apologie pour Garnet, l'appelle *Sororis filiam, patris neptē, fille de sa sœur, niepce de sō pere.*

Nouvellement Henry Garnet, Halle surnommé Oldecorne, Hamon, Iean Girard, Grinuëlle ont esté trouuez complices de la mine de poudre faite, sous la maison, où le Roy avec les Estats du pays se deuoient assembler. Pour lesquels aussi le Iesuïte Iean l'Heureux a escrit vne defense, en laquelle il confesse qu'ils ont sceu voirement l'entreprise, mais qu'ils ne l'a deuoient reueler. A esté aussi trouué qu'ils communiquoient par lettres avec Baudouin, Iesuïte Anglois qui estoit à Bruxelles, lequel ayant esté pris depuis peu en passant par le Palatinat, nous ne doutons point que si on luy serre les doigts, on n'apprenne de luy d'estranges mysteres, & quelque intelligence avec François Rauail-

lac qui auoit esté en Flandres peu auparauant
sa maudite entreprise.

Que si vous passez en Pologne vous trou-
uerez que les Iesuites possedans le Roy ab-
solument & le tenans en tutelle, l'ont porté
a des violences qui ont faict souleuer le pays
contre luy & l'ont mis en grand danger de
perdre son Royaume. Leur humeur factieu-
se est cause que la Suede est perduë pour la
couronne de Pologne, & pour l'Eglise Ca-
tholique. D'autât qu'ils ont induit le Roy de
Pologne à entreprēdre guerre cōtre le Duc
Charles qui maintenant se qualifie Roy pour
luy faire receuoir par force les Iesuites.

La Transsiluanie n'en a point esté exempte:
Nous auons des Lettres du Barō de Zerotin
dattées du 2. de May dernier, où il descriu
comment vn des Seigneurs du pays ayant en
sa maison vn Iesuite, auroit esté induit par le-
dit Iesuite à conspirer contre la vie du Prin-
ce de Transsiluanie, lequel aduertuy du iour
de l'entreprise, sortit expres ce iour là hors
la ville, feignant d'aller à la chasse, & mit des
embusches hors la ville, dans lesquelles il
mena les entrepreneurs, qui le suiuiōēt pour
executer leur entreprise: Il leur en cousta la
vie, & fut ledit Iesuite executé avec carnage
general de ses complices.

La seule maison d'Austriche a ce priuilege
d'estre exempte des conspirations de ceste
Société. La vie des Princes de ceste famille
est sacrée & inuiolable aux Iesuites: Car
ayants pour Patron de leur ordre, & pour

General de la focieté vn Espagnol, auquel ils ont promis, avec serment, vne obédience au eugle: Il ne faut pas craindre que de ce costé-là ils soient incitez à entreprendre contre les Rois d'Espagne, ou contre ceux de sa maison.

Cen'a donc point esté sans cause, que la Republique de Venise, qui se gouuerne par vne prudence admirable, les a chassés de Venise, & de tout son Estat: Elle a recogneu ces gens estre animaux de sang, & flambeaux de guerre, lesquels sôt beaucoup mieux dehors que dedans le pays: car aussi les troubles derniers aduenus aux Venitiés ont cōmencé par les Iesuites? Pource que le Senat ayant decouvert que les Iesuites, par subtils artifices attrapoyent grande quantité de legs testamentaires, & se rendoyent maistres de force terres, au preiudice de la Republique: fut aduisé au Conseil de faire defense aux gens d'Eglise de plus receuoir par testament aucuns biens immeubles, sans la permission de la Republique. A quoy les autres Ecclesiastiques ayans acquiescé, les Iesuites qui s'y opposoyent, & remuoient à Rome, ont esté bannis à perpetuité.

Pour ces mesmes considerations, la ville d'Orleans ne les a voulu receuoir; encores qu'ils l'ayent fort desiré & poursuuy. Ils y auoient enuoyé vn de leur Compagnie prescher le Careme. Les habitâs n'en furent pas beaucoup satisfaits: Car au lieu d'estudier il s'amusoit à rechercher & entretenir ceux

qui auoyent encores en l'ame quelque vieil leuain de la Ligue, par l'entremise desquels ce Iesuite faisoit courir le bruiet que le Roy vouloit qu'ils y feussent establis. Desia ils parloiet de chasser les Moines de Saint Sanson pour auoir leur Eglise, & de deloger Monsieur le Marechal de la Chastre gouverneur de la ville pour auoir son logis, faisãs estat de le ioinre à ladite Eglise avec quelques autres maisons interiacentes. Et sur tous ces preparatifs ayãts faict entendre au Roy, que les hahitans d'Orleans les desiroient fort ils importunerent tant sa Maiesté qu'elle leur accorda d'y auoir vne maison, à la charge toutesfois de le faire consentir aux habitans. Lesquels s'estans solennellement assemblez sur ce suiet, vn nommé Touruille Aduocat celere de ladite ville, homme docte & iudicieux representa fort vertueusement les inconueniens qui pourroient arriuer à la ville s'ils y estoient receus, & monstra par fortes raisons qu'en France, aymer son Roy & les Iesuites estoient choses incompatibles. Les principaux Officiers de la Iustice ayants suivy ce premier ton & tous les habitans s'estans trouuez d'un mesme aduis, il fut arresté qu'ils ne feroient pas receus. Ceste ville a autrefois beu en la coupe de rebellion comme plusieurs autres, mais depuis sa reduction en l'obeissance du Roy, elle luy a tousiours esté fort fidelle, mesmes par ses deportemẽs derniers en l'affliction commune comme elle a plus que nulle autre, tesmoigné sa douleur:

Aussi autant que nulle autre elle faiët tous les iours paroistre par toutes sortes de bons effects la continuation de son obeïssance.

Que les Iesuites sont coupables du parricide de nostre Roy deffunct Henry III.

CHAP. III.

QUICONQVES aura examiné soigneusement les tenants & aboutissants du crime de ce scelerat Rauillac, apperceura aysément que les Iesuites y ont trempé, & que le mal ne vient point d'ailleurs, que de leur instruction.

Il y a quelques cinq ans qu'à S. Victor y auoit vne fille demoniaque, laquelle seruoit d'organe au diable, pour dire plusieurs choses qui sembloient admirables: le P. Cotton meü de curiosité, ou fondé sur la familiarité qu'il a avec ses esprits, s'y transporta pour interroger cét esprit, sur plusieurs choses qu'il desiroit apprendre. Et pour ayder à sa mémoire, escriuit en vn billet les points qu'il auoit à demander: Entr'autres points, ceux cy en estoient: *Quelle issue de la conuersion de Monsieur de la Val: & des entreprises contre Geneue; & de la duree de l'heresie; & de l'estat de Mademoyselle Acarie: & touchant la vie du Roy.* Il y en auoit plusieurs semblables: mais aduint que le P. Cotton rendant à Monsieur Gillot, Conseiller en la grand Chambre, vn liure qu'il luy auoit presté, y laissa par inaduertan-

Paulus li. 5.
Senten. tit.
ii. § 9.
*Qui de salu-
te principis
vel summa
Reipub.
Mathemati-
cos, Artoles
Aruspices
Vaticinato-
res consulit,
cum eo qui
responderit
capite puni-
tur.*
Tertullian.
Apolog.
*Citi autem
opus est scru-
tari super
Cusaris salu-
te nisi à quo
aduersus il-
lam aliquid
cogitatur,
aut post illā
operatur &
sustinetur?*

ce son memoire, lequel estant ainsi tombé
és mains dudit sieur Gillot, il le comuni-
que à quelques personnes, entr'autre à M^o
sieur le Duc de Sully, & ainsi la chose a esté
diuulguee. En vn autre temps, auquel il y
eust eu encores quelque reste de vigueurs ;
c'eust esté pour faire le proces au Iesuite,
estant vn crime capital de s'enquetter du ter-
me de la vie de son Prince, non seulement
par les loix Romaines, dont les Autheurs
estoyent payens & idolatres ; mais aussi par
les diuines, comme il se void au 18. de Deute-
ronome. Et la raison en est rendue par Ter-
tullian, en son Apologitique, à sçauoir, que
celuy-la à des pensees contre la vie du Prin-
ce, qui fait de telles inquisitions sur sa santé.

Deux ans depuis, aduint que Monsieur de
la Forze Lieutenant pour le Roy en Bearn,
par les intelligences qu'il a en Espagne à cau-
se du voisinage, fut aduerty qu'un Espagnol
de telle stature, & de tel poil, & de tel habit,
partoit vn tel iour de Barcelone, pour venir
en France, avec intention de faire mourir le
Roy par poison, ou autrement. Cet Espa-
gnol donc vient à Paris, s'adresse au Pere
Coton, qui le presente au Roy, en le louant
fort. Peu apres arriuent les lettres de Mon-
sieur de la Forze, apres la lecture desquelles
le Roy enuoye querir le Pere Cotton, & lui
montre les lettres de Monsieur de la Forze ;
& luy commande de luy amener de rechef le
mesme Espagnol. Le Pere Cotton respond
qu'il ne pouuoit croire cela, & que cet aduis
estoit

estoit faux: toutesfois qu'il iroit trouuer le-
dit Espagnol, & l'ameneroit à sa Majesté.
Il va donc, puis s'en reuient assez long temps
apres, disant ne l'auoir point trouué, &
qu'il s'en estoit allé. Pour voir clair là de-
dans-il n'est pas besoin d'auoir gueres bon-
ne veüe.

Il n'y a gueres plus d'un an que le Pere
Cotton escriuit à vn Prouincial d'Espagne
diuerfes choses que le Roy luy auoit dites en
secret & reuelé en confession: & qui tour-
noient à opprobre à sa Majesté. Ce qui estât
descouuert fut cause de la disgrace du Pere
Cotton, par l'espace de six semaines. Tou-
tesfois le feu Roy par vne clemence fatale à
sa ruine luy pardonna & le receut en grace.
Mais il se peut souuenir que depuis quelques
iours nostre Ieune Roy, lequel il importu-
noit, luy en fit reproche par vne responce tel-
le qu'il meritoir en ces termes. *Je ne vous diray
rien: car vous l'escriuez en Espagne comme vous auez
faict la confession de mon Pere.*

Et pour approcher du fait de Rauillac
tout ainsi qu'apres la mort de Henry III. on
oyoit à Paris les Iesuites prescher seditieuse-
ment & exhorter les Auditeurs à faire le
mesme à son successeur: entr'autres le Pere
Commelet criant en ses sermons. *Il nous
faut un Ad- fut-il moine fut-il soldat, il nous faut
un Ad-* Ainsi oyoit-on au Carefme dernier
vn Iesuite nommé le Pere Hardy fils d'un
Mercier demeurant sur le pont nostre Dame
preschant à saint Seuerin, & disant: *Que les*

Rois amassoient des thresors pour se rendre redoutables, mais qu'il ne falloit qu'un pion pour mater un Roy. Dont ie puis produire outre plusieurs autres tesmoins, Monsieur le Grand, & Monsieur de la Vau Conseillers de la Cour, qui y estoient presents.

En mesme temps le Pere Gontier preschoit si seditieusement & si iniurieusement contre le Roy, que feu Monsieur le Marechal d'Ornano autant zelé à la religion Catholique qu'un homme qui fut en France, enquis de sa Majesté ce qu'il iugeoit de ses sermons, luy respondit que si Gontier en auoit autant dit à Bordeaux, il l'eust fait ietter dans la riuere. Chacun deslors pronostiquoit quelque grand malheur, & le murmure en estoit si grand parmy les bons François, que m'estant trouué en bonne compagnie ou on en parloit, quelqu'un dit, qu'un fort homme d'honneur nommé Monsieur de la Grange Secetaire de Monsieur le Prince de Condé soustiendroit au Pere Gontier, queluy estant durant ces guerres prisonnier à Perigueux ledit Gontier en presence du Pere Saphore Recteur du College, soustint audit sieur de la Grange que ce seroit bien-faict de tuer le Roy.

Cela n'est pas tout : car pour allumer la meche par les deux bouts, les Iesuites par l'entremise d'un personnage nommé Guron (qui fait du deuot) vouloient prescrire aux Curez des paroisses de Paris, la forme de prescher en ce mesme Carefme, leur don-

nant par escrit plusieurs discours tendans à sedition. Mais plusieurs bons Curez s'en vindrent à Monsieur le Duc de Sully, le priants que par son moyen ils peussent parler au Roy, auquel ils firent leur plaintes, disants qu'on leur vouloit prescrire de prescher choses contre son seruice. La clemence excessiue de ce grand Roy se contenta de faire au Pere Gontier quelques remonstrances, & mesme pour gagner son cœur, le fit son predicateur & luy donna pension.

Comme deuant la foudre on oit vn grommellement dans les nuës, ainsi ces predications & menees sedicieuses estoient des auancoueurs de ce grand coup qui a frappé cest Estat en la personne d'un si grand Roy, & dont nous lamentons la perte: mais la sentirons encôres mieux à l'aduenir.

Adioustez à cela la confession de Rauail-
lac, lequel à soustenu au Pere d'Aubigny lui
auoir dit en confession qu'il auoit enuie de
faire vn grand coup, & luy auoir monstré vn
cousteau, ayant vn cœur graué dessus. Mais
ledit Iesuite à protesté que Dieu luy auoit
faict ceste grace que si tost qu'on luy a reue-
lé quelque chose en confession, il l'oublie in-
continent. Le galand s'est sauué par là. Mais
s'il eust esté en vn autre pays, on luy eust bien
appris l'art de memoire.

Cela se trou-
uera en
l'interro-
gatoire de
Rauaillac,
qui est au
Greff.

Quicôques a sondé ce Rauaillac & l'a examiné de pres a peu recognoistre que ledit parricide auoit esté soigneusement instruit en ceste matiere: Car en tout autre point

de Theologie, il estoit du tout ignorant : mais en la question s'il est loisible de tuer un Tyran. Il sçait toutes les deffaites & distinctions Iesuitiques comme peuuent tesmoigner messieurs les Commissaires, le sieur Coeffeteau Docteur en Theologie, & autres qui ont examiné Rauaillac sur ceste matiere. Lequel parricide a dit plus d'une fois à ceux qui luy demandoient qui l'auoit meu à ceste attentat, *Qu'ils auoient peu apprendre par les sermons de leurs Predicateurs, les causes pour lesquelles il estoit necessaire de tuer le Roy.* Voulant dire qu'il y auoit esté induit par les sermons susmentionnez. Mais il estoit si bien instruit en ce subiect, qu'il estoit aysé à voir qu'outre les exhortations, il auoit receu de longues instructions particulieres.

Ce n'est pas aussi vne petite circonstance que le Pere Cotton ayant obtenu permission de parler à Rauaillac en prison luy dit entre autres choses ; *Gardez vous bien d'accuser les Innocens :* ayant peur qu'il n'accusast les Iesuites : mais les Cordeliers, Carmes, & autres bons Religieux qui n'auoyent point la conscience chargée, n'auoient point peur qu'on les accusast.

Mais d'où vient qu'à Bruxelles & à Prague, où les Iesuites regnent. On parloit de la mort du Roy, douze ou quinze iours deuant qu'elle arriuaist ? A Roüan plusieurs ont receu lettres de Bruxelles de leurs amis demandans d'estre aduertis si le bruit de la mort du Roy estoit veritable, combien qu'elle ne

fust encores aduenue,

Monsieur l'Argentier de Troyes a receu de Prague, lettres du Pedagogue de ses enfans qui luy disēt qu'un Iesuite les auoit desia aduertis de la mort du Roy auant qu'elle aduint, & leur auoit dict qu'apres sa mort Monsieur le Dauphin ne seroit point Roy, mais le Roy d'Espagne, & ce pour les mesmes causes que le Pere Gontier preschoit à l'Aduent & Carefme derniers.

Ie ne dois obmettre la prediction du Preuost de Pitiuiers qu'on a trouué estranglé en prison, lequel estant à Pitiuiers, esloigné de deux iournee de Paris ioüant aux quilles entre plusieurs amis leur dit, *Auiourd'huy le Roy est tué ou blessé.* Ce Preuost estoit Iesuite de faction, & leur auoit donné son fils, lequel est encores auiour d'huy Iesuite.

Plusieurs ont remarqué le despit & indignation general d'un chacun, quand on vit les Iesuites au Louure le lendemain de ce funeste assassinat, avec vne mine riante & asseuree, comme tout allant bien pour eux: & estre presentez à la Roynne par Monsieur de la Varēne leur bien-faicteur & restaurateur: & auoir bien la hardiesse en ceste tristesse publique & douleur si fraiche de demander le cœur du pauvre Roy deffunct, lequel ils ont emporté comme vne espee de conqueste, avec lequel ils deuoient auoir aussi enfeuely la dent de leur disciple Iean Chastel luy auoit pieça rompuë.

Mais qui ne s'est esbahy quand il a veu tous

les corps des Religieux assister aux funerail-
les du Roy, & participer au dueil public,
hormis les Iesuites: lesquels seuls ayans re-
ceu plus de bien-faicts de ce bon Roy, que
tous les autres Ecclesiastiques ensemble, ont
esté seuls qui n'ont daigné accompagner son
corps au tombeau. Ce qu'ayant esté remar-
qué par plusieurs spectateurs, les vns disoiēt
qu'ils ny estoient pas, comme dedaignans
les autres Ecclesiastiques. Mais les plus iu-
diceux disoient que ce n'estoit pas à eux
vne petite prudence & que Tybere & Iulian
ayans faict empoisonner Germanicus au
deuil public qui en fut faict à Rome, ne vou-
lurent point paroistre en public, de peur que
le peuple ne descourist que leur tristesse
estoit feinte & simulee.

*Tacitus li. 3.
Annal. Ty-
berius atque
Augusti pu-
blico absti-
nuere, infe-
rius Maie-
state sua ra-
ti si palam
lamentaren-
tur, anne
omnium ocu-
lis vultum
eorum ser-
uantibus, fal-
si intellige-
rentur.*

Depuis la mort du Roy, ils ont fait tout ce
qu'ils ont peu pour empescher l'effect de sa
volonté, & s'opposer aux choses qu'il auoit
iugé estre pour le bien de son estat. Il auoit
resolu d'enuoyer des troupes en Cleues pour
le secours des Princes Aleman's. Desia Mon-
sieur le Mareschal de la Chastre, General de
ces forces se preparoit pour partir quand
voicy deux Iesuites qui le viennent trouuer,
luy disent qu'il ne pouuoit faire ce voyage,
n'y mener du secours aux heretiques en bō-
ne conscience, & intimident sa conscience
par menaces, comme si faisant cela il ne pou-
uoit estre sauué. Mondit sieur le Mareschal
n'ayant pas trouué leur harangue bonne, ils
vindrent puis apres chez luy changer de lan-
gage pour le rappaier.

*Examen de la Lettre declaratoire
du Pere Cotton.*

CHAP. IV.

EN premier lieu, ie dy que ceste lettre extorquee par la necessité, vient hors de saison, & apres le mal aduenü: Car il failloit auoit escrit contre Mariana, lors que Mariana sortit en lumiere, & que le feu Roy pria le Pere Cotton d'escire à l'encontre.

Ie dy aussi que nous ne sçauons pas s'il parle à bon escient en ceste lettre, ou si selon la doctrine de son ordre, il vse d'equiuocation, & supprime la moitié de sa conception: Ou s'il parle à bon escient, qu'il ne void que ses compagnons ne sont pas de son aduis, puis que nul d'eux n'a soubsigné son liure, ny approuué? Ce qui estoit necessaire en vne chose tant publique, & tant importante.

Aussi est-ce en vain qu'il allegue quantité d'autheurs Iesuites qui condannēt le meurtre des Rois: Car tous ces passages de Iesuites parlent des Rois, que le Pape & les Iesuites recognoissent pour Rois: Mais nous auons monstté cy-dessus par grand nombre d'Autheurs Iesuites, & par leurs actions, que quand les Iesuites ont attenté à la vie d'un Roy, qu'ils se sauuent par là, en disant qu'ils ne tiennent point un tel estre Roy, encores qu'il en porte le nom, pource qu'il est excommunié, ou pource qu'il est ennemy de

Ce sont les
mots de
l'interro-
gatoire.

21. quæst.
64. dis. 5.
49.

l'Eglise: Et de faict ce miserable Rauillac alleguoit cecy pour cause de son attentat, à sçauoir, que le Roy vouloit faire la guerre au Pape, & que le Pape estoit Dieu, & par consequent, que le Roy vouloit faire la guerre à Dieu.

Pourtāt le Reuerend Abbé du Bois à bien obserué en sa responce à Pere Cotton, que là où Gregoire de Valence Iesuiste, dict qu'il n'est nullement permis d'attenter à la vie de son Prince, jaçoit qu'il abuse de son autorité, qu'il adiouste, *Si cela ne se faict par vn iugement public.* Or tous les Iesuistes tiennent que le iugement du General de leur ordre, est vn iugement public, & auquel ils doiuent acquiescer, comme à la voix de Christ, comme nous auons monstre: Nous tenons aussi le iugement du Pape, pour vn iugement public.

Aussi nous auons veu cy-dessus que l'Apologie du Iesuiste Eudemoniohannes approunée du General Aquaiua, & de trois Docteurs Iesuistes, dict que les Iesuistes n'approuuants point le meurtre des Rois, toutes-fois en ayment l'euenement, tellement qu'il ne sert de rien au Pere Cotton de condamner l'autheur du meurtre du Roy, si cependant il en ayment l'euenement, c'est à dire, la mort du Roy.

Et de vray, c'est frauduleusement qu'il fait protestation d'approuuer le Decret du Concile de Constance, condamnant la proposition de Iean Petit, & declarant que ce n'est

a vn fuiet de tuer vn Tyran : Car les Iesuites ont leur eschappatoire prestee, & qui est veritable, à sauoir que le Concile de Constance parle des Tyans qui sont Rois legitimes, & qu'il ne parle point des Rois deposez par iugement public, & dont les suiets ne sont point dispensez & absous par le Pape du serment de fidelité: ny des Rois qui sont iugez ennemis de l'Eglise. Car si les Iesuites ont entrepris de tuer vn Roy, ils trouueront aisément quelque raison pour prouuer qu'il n'est pas Roy, & que par consequence ils ne font rien contre le Concile de Constance, ny contre les passages des Iesuites alleguez par le Pere Cotton.

Ce que le Pere Cotton adioute que c'a esté l'opinion de Mariana seulement, & non de tout l'ordre, a esté refuté au 1. chap. par l'approbation de bon nombre de Iesuites. escrite au front du liure de Mariana, & par les liures de plusieurs Iesuites. qui disent le mesme que Mariana, & mesme le louent, & defendent: Ioint que le Iesuite Cotton condamne Marian si mollement, que ses reprehensions sont plustost flatteries.

Quant a ceste decision pretenduë qu'il nous veut faire accroire auoir esté faite en vne assemblee prouinciale des Iesuites, par laquelle il dict qu'ils ont condamné Mariana? ie trouue que par celà il empire son marché, puis que les Iesuites ont tenu ceste decision cachee, & nont point voulu qu'on en sceust rien. Auoient-ils peur de rendre les

François trop affectionnez à la conseruation du Roy? ou craignoient ils d'offencer les Iesuites d'Espagne en publiant leur condamnation contre Mariana? Sans doubte vous trouuerez ou que ceste decifion n'a iamais esté faite, ou si elle à esté faicte, que cest quelque chose d'équiuocque & ambigu.

Ce qu'on croira plus aisement, quand on aura regardé de pres la confession des Iesuites, sur ceste matiere, laquelle le pere Cotton reduit à quinze chefs ou articles, qui ne sont qu'enueloppemens de paroles, & qui exposent la croyance des Iesuites, sur des points qu'on ne luy demande pas: Car voicy sur quoy on attendoit sa confession de foy.

- I. Si quand le Superieur des Iesuites leur cōmandera d'entreprendre contre le Roy ils luy doiuent obeyr.

- II. Si le Pape peut dispenser les subiects du serment de fidelité iuree à leur Roy.

- III. Si vn Roy deposé du Pape & excommunié est encores Roy, & si les subiects luy doivent encores obeissance és choses temporelles apres l'excommunication.

- IV. Si quand vn bon Catholique à descouvert à vn Iesuite en confession son intention de tuer le Roy, ledit Iesuite doit reueler ceste confession, ou bien la tenir cachee.

- V. Si le Pape peut donner & oster les Royaumes, & les transferer, à qui il luy plaist. Notamment si les Iesuites approuuent le Canō, qui dict que le Pape peut oster la courōne à vn Roy, encor' qu'il n'ait point failly.

VI. Si les Roys sont superieurs des Clercs, c'est à dire, si le Roy a puissance sur leurs biens & sur leurs vies, autant que sur celle des autres suiets.

VII. S'il faut garder la foy iurée aux ennemis de l'Eglise.

VIII. Si vn Iesuïte accusé de trahison, & prisonnier pour ce crime peut legitiment user d'equiuocations en respondant.

IX. Si pour tuer ses ennemis, il est loisible de faire mourir ses ennemis.

X. Si la rebellion d'un Clerc contre le Roy est vn crime de leze Majesté.

XI. Si on peut en haïssant le Parricide d'un Roy, en aymer l'euenement.

XII. Si Garnet & Oldecorne sont Martyrs: & si Guignard a esté iustement condamné à mort.

Ce sont les points sur lesquels tous les bōs Catholiques desireroient que les Iesuïtes fussent catechisez, & qu'il pleust à la Royne Regente, & à Messieurs des Princes du Sang, Officiers de la Couronne, & Seigneurs du Conseil, de commander au Pere Cotton, & à ses compagnons, d'escrire claiement, & publier leur confessiō, afin d'arracher au peuple ces nouuelles impressiōs qui affoiblissent l'autorité de nos Rois, & mettent leur vie en danger au lieu de nous bailler des articles qui ne touchent point au faict, qui sont couchez en paroles obscures & douteuses semblables à vn cousteau de tripiere qui coupe des deux costez.

Tel est le premier article. *Tous les Iesuites*
 (dit-il) *en general & en particulier signeront voi-*
re de leur propre sang, qu'ils n'ont en ceste matiere ny
en autre quelconque autre foy doctrine & opinion,
que celle de l'Eglise Romaine. En cela il parle con-
 tre sa conscience; car si les particuliers des
 Iesuites sont d'accord en tout il s'en suit que
 Cotton & Mariana sont d'accord ensemble,
 & que Cotton a eu tort de le condamner.
 Quant à celle qu'il dit que tous les Iesuites
 signeront qu'en ceste matiere ils n'ont autre
 croyance que l'Eglise Vniuerselle, ie respōs
 que les Iesuites signeront aysément tout ce
 que l'on voudra, puis qu'ils ont des *retentions*
 & conditions cachees, qu'ils se reseruent en
 leur esprit, mais ie suis bien assuré que l'E-
 glise vniuerselle ne soubsignera rien de ces
 sentēces abominables des Iesuites que nous
 auons cy dessus produites de leurs liures, &
 approuuera encorés moins leurs faits.

Son second article est, *qu'entre toutes les*
sortes de gouuernemens & administration publique
la Monarchie est la meilleure. À quel pro-
 pos cela? Il n'est pas necessaire que ceux
 qui estiment la Monarchie estre meilleure
 que la Democratie, pour cela fācent scrupu-
 le de tuer les Rois: ou que leur intention soit
 de vouloir changer la forme de l'Estat en
 voulant tuer le Roy. Ains seulement, ils veu-
 lent vn autre Roy, pource que celuy qui vit
 leur deplaist.

Le troisieme article sent du tout la veine
 & les termes Iesuitiques, car ce ne sont qu'e-

quiuocations & retétions mentales, il dict.
*Que tel est le gouuernement spirituel de l'Eglise qui
 se rapporte au Vicaire de Iesus-Christ, successeur de
 saint Pierre; tel le temporel de l'estat & Royaume
 de France qui se termine à la personne du Roy no-
 stre Souuerain Seigneur & Maistre.* Cela n'est
 rien dire au fonds & parler avec trop de diffi-
 mulation: Car il n'a osé dire que le Roy est
 aussi simplement absolu en son Royaume
 que le Pape en l'Eglise: car les Iesuites (seuls)
 tiennent que les Papes peuvent déposer les
 Rois, mais ils ne tiennent pas, que les Rois
 peuvent déposer les Papes: Ils tiennent que
 les Papes peuvent dispenser les sujets d'obeir
 aux Rois: mais ils ne tiennent pas que les
 Rois puissent dispenser les Chrestiens d'o-
 beir aux Papes: Ils tiennent que le Pape a
 pouuoir sur le temporel des Rois, par puis-
 sance, ou directe, comme disent quelques
 vns, ou indirecte, comme disent les au-
 tres: Mais ils ne croient pas que les Rois
 aient puissance directe: ny indirecte sur le
 spirituel, ny sur le temporel des Papes: Ils
 tiennent qu'il y a plusieurs personnes en
 France, qui ne sont point iusticiables de-
 uant les Iuges Royaux: mais ils ne tien-
 nent pas qu'il y ait aucun homme sur les ter-
 res du Saint Pere, qui ne soit iusticiable de-
 uant les Officiers de sa Sainteté: Ils tien-
 nent que le Pape peut leuer deniers, & pren-
 dre Annates sur les terres Ecclesiastiques du
 Royaume de France: Mais ils ne tiennent
 pas que les Rois de France puissent leuer au-

cuns deniers sur les personnes, ne sur les terres d'Italie, qui sont du patrimoine de saint Pierre.

Car il n'est pas croyable que le Pere Cotton vueille s'opposer au Cardinal Bellarmin Iesuite, duquel tous les Iesuites sont auourd'huy disciples & apprentifs, lequel au 5. liure du Pontife Romain, chap. 6. parle ainsi, *Le Pape peut changer les Royaumes, les arracher à l'un & donner à l'autre comme souverain Prince spirituel, & quand cela est necessaire pour le salut des ames*, duquel aussi nous auons cy dessus appris que les Rois ne sont point les Superieurs des Clercs. Luymesme au deuxiesme cha. du liure de l'exemption des Clercs, appelle tous les Rois & Princes en general, *Hommes profanes*: Et en diuers endroits, il soustient que *la puissance des Princes seculiers n'est qu'une institution humaine, & est seulement du droit des gens*. Quoy que l'Apostre Rom. 13. die. *Qu'il n'y a point de puissance, sinon de par Dieu, & que les puissances qui subsistent, sont ordonnées de Dieu*.

Cen'est donc point la creance des Iesuites d'estimer que les Rois soyent Rois, comme le Pape est chef de l'Eglise, puis qu'ils ne sont Rois que par institution humaine: mais le Pape est le chef de l'Eglise vniuerselle, par l'institution de Dieu. Bref Cotton ne parle qu'à demie bouche & parce qu'il dit, il est impossible d'apprendre ce qu'il croit. Il est ainsi des autres articles.

Le dernier article est vne reclamation contre ceux de la religion pretendue refor-

Quis dice-
re audeat
ius esse pro
fano in ea
quæ sancta
anctorum
id est san-
ctissima di-
ci metue-
unt.

Lib. I. de.
Ro. Pont.
cap. 7. §
Postremo.

Prætera
principa-
lis secula-
ris institu-
tis est ab
hominibus
est que de
iure gen-
ium. At
principa-
lis Eccle-
siasticus
ista solo

me, plusieurs liures desquels il dit estre infamez de ceste opinion, qu'il est loisible à vn sujet de tuer son Roy: Apres cela il adioute, l'en marquerois & specifierois les passages, & alleguerois les paroles, n'estoit qu'il vult trop mieux qu'elles demeurent engloutis dans labysme de l'oubly. O qu'il donne icy sujet de triompher a nos aduerseres, qui diront que si le Pere Cotton eust sceu les passages il n'eust failli de les mettre en veüe, & eust esté bon de nommer les liures, afin de les supprimer, ou punir les auteurs s'ils viuent.

Or la dessus j'ay eu la curiosité de m'esclaircir & m'estant enquis de quelques-uns de la religion contraire non ignorans, ils m'ont dit que voirement le Concile de Constance en la Session VIII. fait vn denombrement des heresies de Vviclef, & l'accuse entre autres choses d'auoir creu que *Nul n'est Seigneur ou Souuerain es choses ciuiles pendant qu'il est en peché mortel. Item que le peuple peut selon sa Volonté corriger les Princes qui ont failly.* Et que Buchanan historien & Poëte Escossois au liure de *Iure regni apud Scotos* parle de mal mener les Rois & les chasser quand ils sont Tyrans. Mais que le Concile de Constance calomnie Vviclef non seulement en ce point: mais aussi en plusieurs autres: Que cela ne se trouuera point en ses escrits. Et qu'il n'estoit point present pour se defendre. Qu'avec pareille calomnie le mesme Concile l'accuse d'auoir dit que *Dieu doit obeir au diable.* Que Buchanan n'estoit point Theologien & qu'il a es-

Dco.
il dit le mesme au liure de Exemptione Cleric. cap. 1.
§ ad confirmationem.

Articulo 15. Nullus est Dominus ciuillisdum est in peccato mortali & Artic. 17. Populares possunt ad arbitrium suum dominos delinquentes corrigere.

crit ce qui se faisoit en Escosse auant le changement de religion. Qu'en cela il n'a point baillé de reigles: mais a depeint l'humeur & coustume de sa nation. Qu'entre leurs Docteurs il se trouuera bien quelques paroles de liberté contre les Rois qui persécutent leurs Eglises, iusques à dire que non obstant leurs malices ils ne laisseront d'auancer l'œuvre de Dieu, & choses semblables. Mais qu'on n'y trouuera vn seul mot de conseil de tuer les Rois, ny vn seul precepte de rebellion. Que Luther a escrit voirement contre le Roy Henry VIII. d'Angleterre avec du mespris excessif & indiscretion en parolles: mais que Luther n'estoit point son sujet, & qu'il ne parle point de tuer les Roys, ny de se rebeller contre son souuerain, & pourtant que ces exemples ne sont à propos.

Ce que ie dis, non que ie m'arreste à ces defences, que ie laisse pour telles quelles sont, mais pour inciter le Pere Cotton à parler plus clairement là dessus, de pœur que nos aduersaires ne dient qu'on les accuse sans preuue, & sans monstrier de quoy.

Ce qui reste de la Lettre Declaratoire du Pere Cotton, n'est qu'une peroration declaratoire, où il parle d'Otacoustes, Pro-sagogides, & quadruplateurs, mots qui nous eussent arresté, s'il les eust mis à l'entrée; car ce sont mots trop difficiles pour nous, qui n'entendons que le Latin d'Accuse, & qui nous estudions à estre aussi bons François que les Iesuites sont bons Espagnols.

s'il est

S'il est vtile pour le bien de l'Estat, que le Pere Cotton soit près de la personne du Roy, ou de la Royne Regente, & si les Iesuites doivent estre soufferts.

CHAPITRE V.

SI tout le monde s'est esbahy devoir apres le coup de cousteau de Iean Chastel, apres la condamnation des Iesuites, par Arrest de la Cour, apres la Pyramide dressée, pour memoire, neantmoins peu apres ces Peres estre restablis, & posseder le cœur du Roy duquel ils auoient entamé la bouche; Aussi est-ce chose autant admirable, de voir aujourd'huy apres sa mort si horrible, ceux qui ont introduit la doctrine des parricides, & qu'on sçait auoir esté de l'entreprise, subsister encores, & estre proche de la personne du Roy.

Ie veux croire que la personne du Pere Cotton soit exempté de ce crime: & que le Pere Gontier & Aubigny ne luy en ayent point communiqué, & qu'il n'ait eu nulle intelligence avec les Iesuites de Bruxelles, Si est-ce que ces mœurs & sa profession sont telles, qu'il n'est nullement expedient ny honneste de l'approcher de la personne de sa Majesté.

Premierement, ie dy que Cotton qui se dit Religieux mesme d'une compagnie qui

prend le nom de Iesus, est en scandale à toute l'Eglise, estant toujours à la suite de la Cour, car celà est contraire, non seulement à l'institution de tous les Moines, mais particulièrement aux Reigles des Iesuites, comme nous en asseure le Pere Richeome en sa plainte Apologetique : & le Cardinal Tollet Iesuite, en son liure de l'Institution des Prestres, liur. i. chap. 40. tient generallyment qu'un Religieux qui se retire es Cours des Princes, est excommunié, encores qu'il en ait permission de son Superieur.

En apres, pour imprimer la vertu dedans le cœur d'un Prince, il faut mettre pres de sa personne, des hommes ennemis des vices, & qui ne le flattent point en ses imperfections: C'a esté vne des fautes du Pere Cotton, de conuiuer aux plaisirs du feu Roy au lieu de l'en destourner. Et il estoit tel que si un homme ennemy du vice eust tenu la place du Pere Cotton, il eust esté aisé de le retenir. C'est la plainte que nous en faisoit dernièrement le Pere Portugais au sermon funebre qu'il fit à S. Iacques de la Boucherie & qu'il a depuis faict imprimer.

Encores n'est-ce pas tout, car au lieu de l'en destourner il l'y incitoit disant voire en plein sermon que sa Majesté recompensoit ses pechez par beaucoup de merites. Que Dauid a commis des desbauches: toutefois qu'il estoit l'homme selon le cœur de Dieu.

Il faisoit bien pis: car il estoit messager d'amour, & portoit aux Dames des paroles d'a-

mitié. Vn grand Prince de ce Royaume, & qui a present est en Cour, pourra certifier, que s'esbahissant de ce que le Pere Cotton s'employoit a amener au Roy vne certaine Damoiselle, ledit Iesuite luy respondit, que c'estoit voirement vn peché: mais qu'il falloit plustost auoir esgard a la santé du Roy, duquel la vie estoit tant necessaire à l'Eglise, & que ce mal seroit recompensé par vn plus grand bien,

Quand a sa vie on y recognoist vne hypocrisie insigne. Il s'est vanté en presence de plusieurs Seigneurs de la Cour qui viuent encores, de n'auoir faict aucun peché mortel depuis vingt & deux ans, & cependant l'Abbé du Bois luy a soustenu & soustiendra qu'il y a moins que cela que sentence a esté donnee contre luy à Auignon pour auoir engrosié vne Nonain. Monsieur des Bordes Sieur de Grigny, homme auquel rien ne defaut sinon que d'estre Catholique, a encores par deuers soy des lettres du Pere Cottó à Mademoiselle de Clarasac de Nismes, escrites de sa propre main, par lesquelles apres forces protestations d'amitié il luy dit, *qu'il espere la voir bien tost pour luy payer le principal, & les *apports de son absence. Et que l'affection qu'il luy porte est telle qu'il ne se promet point d'auoir en Paradis vne ioye accomplie, s'il ne la trouue là.* Ceste Damoiselle estoit aussi couchee entre les questions que ce Iesuite faisoit au diable.

* C'est à dire les arriérés.

Qui est-ce qui n'admire en cet homme vne

impudēce incroyable qui se fourre par tout, qui ne se rebute point pour cent refus, qui s'ingere à tout faire, qui se rend compagnon des Princes, qui en ses meditations qu'il publie, semble vouloir cageoler Dieu & l'endormir de paroles qui sentent sa putain? Quel creue-cœur estoit ce de voir vn chetif Iesuite assieger l'esprit du Roy, & estre par maniere de dire pendu à sa ceinture, pendant que des Princes & Seigneurs qui luy ont faiēt de grands seruices, auoient beaucoup de peine d'en approcher? Je ne puis conceuoir la cause pour laquelle les autres Ecclesiastiques, qui depuis plusieurs siecles, sont les colōnes de l'Eglise des Gaules, qui n'ont iamais mis la main sur leurs Rois, & qui ne les ont point abandonné en leurs afflictions, notamment durant les derniers troubles, n'auront la mesme faueur que ces nouueaux venus, qui ne sont point subiects aux Euesques, mais dependent immediatement de leur General Espagnol, & du Consistoire: & qui ont esté desia chassiez pour crime de parricide? Les autres ordres de Religieux n'ont-ils pas mieux meritē d'estre Confesseurs du Roy, ou Predicateurs de la Royne, desquels ces gens icy escriront les confessions à quelque Prouincial de Castille, ou à leur General à Rome?

Que si en sept ou huit ans, depuis leur r'appel, ils ont si bien faiēt qu'ils ont en diuers endroits de la France acquis pour plus

de cent mille escus de rente & baity en plusieurs endroits, signamment à la Flesche vne maison qui reuiert à plus de deux cens mille escus, que ferōt-ils s'ils sont encores en Frāce vne vingtaine d'annees! C'est vn chancre qui gaigne tousiours. Ils ne peuuent estre en vn lieu sans y regner. Desia ils bastissent vn nouuiat aux fauxbourgs S. Germain dans l'enclos duquel on pourroit enfermer vne ville où le Recteur de l'Vniuersité n'aura que voir où ils attireront toute la ieunesse, pour ce qu'ils sont plus subtils que les autres à s'insinuer és familles, à entretenir les femmes deuotes, à caresser leurs enfans, à ne prendre ny lendy ny chandelles des escholiers, cependant qu'ils engloutissent les terres & successions entieres. Dont aduiendra que l'Vniuersité de Paris ne sera plus qu'une ombre & ne peut eiter vne ruine asseuree. D'icy à dix ans le conseil Priué & les Cours de Parlemens, & le grand Conseil seront remplis de disciples de Iesuites, & le reste du Clergé ne sera plus rien estimé: car ils ont dessein de le raualer, & en parlent avec mespris comme s'ils estoient ignorents. Cependant i'ay ouy dire à plusieurs gens doctes, & particulièrement a Monsieur le Cardinal du Perron, que ce sont gens ignorans, & qui ruineront les lettres. Pour le restauratiō desquelles mondit Sieur le Cardinal s'est proposé d'eriger vn nouveau college en l'Vniuersité, où il releuera les lettres descheues depuis que ces gens les ont souillees les ayās reduites à vne

chétive pedanterie & des petits recueils qu'eux-mesmes ont ramassé.

Cela seroit peu de chose, n'estoit qu'en faisant des sçauans & des entendus, ils empiètent sur l'Estat, & taschent de mettre les Rois en tutelle, & esmeuent les peuples à sedition, lesquels s'ils eussent trouué aussi prompts à s'esmouuoir qu'ils sont ardens à les solliciter, desia la France ruisselleroit de sang, & la mort du Roy eust esté suiue de massacres, tant d'une que d'autre religion: Car c'estoit leur esperance en ce mal'heureux parricide, de laquelle s'ils sont descheus pour ce coup, ils trouueront bien le moyen de renouïer la partie.

Cependant mes Seigneurs du Conseil, & Messieurs de la Coui de Parlement iugeront s'ils peuuent en bonne conscience, permettre les confessions à des personnes qui ont serment de ne rien reueler de ce qui sera necessaire pour la conseruation du Roy, & s'ils ne doiuent estre cōtraints de se departir d'une si damnable doctrine, qui les rend coupables de trahison. Que sert de brusler vn liure par le bourreau pendant qu'on souffre les personnes, & en vouloir à du papier pendant qu'on n'ose pas seulement nommer les Iesuites, de peur de les offencer? Qu'ils regardent aussi s'ils veulent voir la ruine de l'Vniuersité de Paris, qui depuis Charles-Magne a tousiours esté vn des ornemens de ce Royaume; où s'ils veulent en souffrant l'accroissement de ces gens, & leur

establiſſement en Cour, tenir toujours en defiance les Catholiques fideles au Roy, & en apprehenſion de voir encores vn troiſieſme parricide; Qu'on leur deſende de ſe meſſer d'affaires d'Eſtat; qu'ils preſchent l'E-uangile, & les commandemens de l'Egliſe: Que les peres & meres ſoient obligez d'enuoyer leurs enfans aux Colleges de l'Vniuerſité, & qu'il n'y ait point deux Vniuerſitez ſeparees: Qu'on ſçache ce que font les Ieſuites de tant de richesses, veu qu'on ſçait qu'ils ſont peu en nombre, qu'ils ne dependent, ny en habits, ny en cheuaux, ny en ſeruiteurs. A quoy donc tant de reuenus, ſinon pour voyages & commiſſions en pays eſtrange, & pour faire vn magazin qui ſerue à gager les ennemis de cet eſtat, & fournir aux frais de quelque rebellion, comme ils ont fait en la Ligue derniere; Car ie trouue que ce Polonois auoit raiſon, qui diſoit que la ſocieté des Ieſuites eſt vne eſpee à qui la France ſert de Fourreau, mais la poignée eſt en Eſpagne où à Rome, ou eſt le General des Ieſuites; car le commandement de tirer ceſte eſpee vient de là.

C'eſt ce que nous auons à dire ſur ceſte matiere: à quoy ie voudrois bien que quelqu'un reſpondiſt de point en point, ou pluſtoſt que nous voulüſſions ouurir les yeux à ces conſiderations, qui ſont totalement claires & neceſſaires: Que ſi en ce faiſant nous acquerons plus de hayne que nous ne faiſons de profit; ſi aurons nous ceſte conſolation de

n'auoir point manqué à nostre deuoir, en
proposant les choses nécessaires pour le bien
de l'Estat, & pour la paix & seureté de l'E-
glise.

QVATRAIN.

A LA ROYNE.

*Si vous voulez que vostre Estat soit ferme
Chassez bien loin ces Tygres inhumains,
Qui de leur Roy accourcissant le terme,
Se sont payez de son cœur par leurs mains.*











